

La vie du:

Saint Prophète(s.a.w)

Massih Maoud(a.s)

Musley Maoud(r.a)

SOMMAIRE

LA VIE DU ST PROPHÈTE (S.A.W)	p. 314
LA VIE DU MESSIE PROMIS(A.S)	p. 345
LA VIE DU MOUSLEH MA'OUUD(R.A)	p. 374

LA VIE DE HAZRAT MOHAMMAD(S.A.W)

1. So l'enfance et so jeunesse

Le Saint Prophète^(s.a.w) ti né en août de l'année 570 à la Mecque, dans l'Arabie. Li ti zenfant d'ene grand famille qui ti appelle Banou Hachim et so famille ti appartenir à la tribu Quraiche. So papa qui ti appelle Abdullah ti mort avant so naissance même, de ce fait li ti né orphelin de père. So maman ti appelle Amina. Comment li pas ti énan papa, c'est so Dada Abdoul Moutalib qui ti prend li et so maman sous so charge.

Quand le Saint Prophète^(s.a.w) ti né, so maman fine rode ène nourrice pour li, parce qui, à ça l'époque-là, li ti courant qui banne zenfant quitte la ville et alle côte banne nourrice qui nourrit zotte et qui reste dans banne régions plus saine pour qui zenfant-là so la santé vine plus bon. Alors, pour le Saint Prophète^(s.a.w) aussi, li ti pareil. So nourrice ti appelle Halima et li ti reste dans ène region montagnaise qui ti appelle Ta'if. Quand période l'allaitement fine fini et qui Hazrat Mohammad^(s.a.w) fine grandit, so nourrice fine retourne li côte so maman – à la Mecque.

Quand Hazrat Mohammad^(s.a.w) ti énan six ans, so maman aussi fine mort, et à ce moment, li ti complètement orphelin. C'est à dire, li pas ti éna ni papa, ni maman, mais so grand-père fine continué prend li à so charge pendant encore deux ans, jusqu'à qui grand-père là aussi fine mort. Et après la mort de Abdoul Moutalib, Hazrat Mohammad^(s.a.w) fine alle reste côte so chacha qui ti appelle Abou Talib. Mais ène quique chose qui tous dimoune ti remarqué, c'est qui Hazrat Mohammad^(s.a.w) pas ti pareil comment les autres enfants. Depuis so l'enfance même, li ti un peu à part: quand ti arrive l'heure pour manger, jamais li pas ti pé costé cotte marmite, mais li ti pé reste un peu loin, et quand les autres enfants fine fini gagne zotte manger et arrive so tour, li ti pé mange ce qui ti pé donne li avec contentement.

A ça l'époque-là, l'Arabie qui ti ène grand pays, tous so peuple ti banne barbares sauvages et arriérés. Pas ti énan aucun la loi ni l'ordre, presque tous ti soulards — pas ti énan aucun respect et considération pour banne madames. Dans certaines familles, naissance ène tiffille ti

considéré comment ène la honte, alors papa là ti pé enterre bébé tiffille là vivant pour qui papa là pas senti li abaissé dans so l'entourage. Banne madame pas ti énan aucun droit, et ène missié ti énan droit marié avec quatité madames qui li ti envie. Apart zotte ti soulards, zotte ti aussi bien content banne jeux du hasards (gambling, joué pou l'argent). Ça peuple là ti tellement barbare et violent qui pendant banne la guerre zotte ti pé mange le coeur de zotte l'ennemi pour apaise zotte vengeance. L'esclavage ti bien commun. Du côté de la religion, banne Arabe ti considéré comme banne idolâtres bien ferme, car ti énan 360 idoles dans la Ka'abah – tous les jours zotte ti pé prié ène idole spécifique. Ça c'est ène l'idée qui capave gagné lors situation de la société qui ti pé régné à l'époque du la naissance de Hazrat Mohammad^(s.a.w).

Arrivé à l'âge de vingt ans, Hazrat Mohammad^(s.a.w) ti joine ène association appelle Hil Foul Fazoul pour défendre l'intérêt de banne pauvres et opprimés (ban qui ti dominé) et pour protége zotte.

Ene fois, ène dimoune de la Mecque ti vine côte le Hazrat Mohammad^(s.a.w) et fine faire ène plainte qui Abou Jahal doit li l'argent et qui li pé refuse rembourse so dette. Abu Jahal ti parmi de banne chef de la Mecque et aussi le pire l'ennemi du Hazrat Mohammad^(s.a.w), mais pour ène moment aussi le Saint Prophète^(s.a.w) pas ti hésité et li fine alle côte Abou Jahal pour demande li pour rembourse ça dette là.

Comment li fine trouve Hazrat Mohammad^(s.a.w), Abou Jahal fine obéir tout de suite et fine rendre l'argent qui li ti doit. Plus tard, banne les autres chefs fine appranne ça, zotte ti surpris et zotte fine demande Abou Jahal qui faire li fine retourne ça l'argent là sans aucun protestation, avec si d'empressement. Alors Abou Jahal fine raconté qui li ti trouve Hazrat Mohammad^(s.a.w) bien en colère, et qui ti éna deux chameaux furieux de chaque côté de Hazrat Mohammad^(s.a.w), qui ti prêt pour saute lors li. Alors li fine peur et li fine donne l'argent là tout de suite. C'était ène vision qui Abou Jahal fine faire, et de cette façon Allah fine aide Hazrat Mohammad^(s.a.w) pour faire so travail.

2. So mariage avec Hazrat Khadija^(r.a).

Depuis so l'enfance, Hazrat Mohammad^(s.a.w) ti enan l'habitude cause vrai, a tel point qui dimoune ti pé donne li ène titre Al-Amine (le véridique). So l'honnêteté ti populaire et de cette façon-là, Hazrat Khadija^(r.a) qui ti ène veuve bien riche fine appranne qui le Saint Prophète^(s.a.w) ti éna ça trait de caractère et à cause ça li fine confié li so caravane commerciale pour la Syrie – et ça ti rapporte ène gros profit. Hazrat Khadija^(r.a) ti bien impressionné par capacité et l'honnêteté du Saint Prophète^(s.a.w) et li fine envoye ène proposition de mariage au Saint Prophète^(s.a.w). Malgré la différence d'âge (Hazrat Khadija^(r.a) ti éna 40 ans et Saint Prophète^(s.a.w) ti éna 25 ans) et le Saint Prophète^(s.a.w) fine accepté. Après le mariage, Hazrat Khadija^(r.a) ti remette tout so du bien à Hazrat Mohammad^(s.a.w), qui fine aussitôt libère tout banne esclaves et fine partage la majorité de banne richesses parmi banne pauvres.

3. Première révélation

Quand le prophète fine arrive à l'âge de trente ans, so l'amour pou Allah fine vine plus grand. Li ti quitte banne travail de tous les jours et prend un peu provision avec li et li ti alle dans ène la cave Hira qui ti à ène ti distance de Mecca, pou alle prier Allah tout seul loin de tout. Quand li ti arrive à l'âge de quarante ans li fine gagne ène vision au cours de ène la nuit vers la fin du mois de Ramadan. Éne joli personnage ti paraîte devant li et fine ordonne li pou réciter. Le St Prophète^(s.a.w) alors dire li qui li pas pou capave réciter parce qui li péna aucun connaissance. Ça personnage-là fine insister et oblige le St Prophète^(s.a.w) pou récite banne versets suivant:

« Récite avec nom to Seignère Ki finne créé, *Ki* finne créé l'homme d'ène caillot qui éna tendance pou forme ène lien. »(Quran 96 : 2, 3)

C'est alors qui le St Prophète^(s.a.w) ti récite banne premier versets du Saint Quran qui pou amène l'amour d'Allah dans les cœurs de banne dimounes. Ça banne versets Quran-là prédire l'époque cotte le monde pou gagne connaissance de la science par la plume et banne les autres quitte choses qui zotte pas ti conner exister-même. ça grand responsabilité-là ti faire le St Prophète^(s.a.w) bien tracasser.

Quand li fine rentre so la case li fine raconte so madame Hazrat Khadija(r.a) ce qui fine passer et Hazrat Khadija(r.a) fine encourage li et dire li : « Sûrement Allah pas cherche pou déshonore ou, alors qui tout le temps ou aide ou banne proches, ou aide banne pauvres, ou travail pou banne qui faible, ou traite ou banne invités bien et ou toujours secourir banne victimes de l'injustice. »

Hazrat Khadija(r.a) fine alors amène St Prophète(s.a.w) cotte so cousin qui ti ène chrétien Waraqua bin Nawfal, qui ti bien vieux et aveugle. Quand Waraqua bin Nawfal fine écoute zotte alors li fine dire zotte : « Même ange qui ti cause avec Moïse(a.s) fine vine vers ou. Mo regretter qui mo âgé. Mo ti a content qui mo plus jeune ou encore en vie pou mo trouver quand ou peuple pou repousse ou. » Alors le St Prophète(s.a.w) ti étonner pou entendre li dire qui so peuple pou rejette li car li ti conner qui la plupart dimoune ti respecter li. Alors Waraqua dire li : « Oui, personne pas apporte ce qui to pé apporter sans faire banne ennemis. »

4. Le Prophète ridiculisé

Banne premiers qui ti croire en li ti so madame Khadija(r.a), so cousin Ali, ène esclave libéré Zaid et so compagnon Abou Bakr(r.a).

Ene jour, Allah ti ordonne le St Prophète(s.a.w) pou monte lor colline safa et pou appelle tout banne tribus par zotte nom, ène par ène. Quand tout dimoune fine réuni li fine adresse zotte: “O banne Qureish si mo dire zotte qui derrière ça colline-là éna ène grand l’armée qui pé préparer pou attaque zotte, est-ce qui zotte pou croire moi?”

Alors tous fine réponne ensemble qui bien sûr nous pou croire ou car tous les temps ou fine dire la vérité. Alors li dire zotte : « Bien bon. Écoute-moi, mo pé annonce zotte qui ène punition pou vine lor zotte, croire dans Allah pou qui zotte chappe de ça punition-là. » Lerla tous dimoune fine grogner et fine aller.

5. Banne fidèles persécuté

Le St Prophète(s.a.w) ti pé gagne banne nouveau révélation régulièrement. Messages de l’Islam fine faire banne dimoune gagne l’espoir dans le coeur. Banne madames fine gagne zotte droits, banne esclaves ti pé trouver qui bientôt zotte pou vine banne dimoune libre. Banne jeune ti pé trouver qui zotte pou faire progrès. Et banne fidèles fine commence augmenter. Banne chefs mecquois ti pé commence tracasser alors zotte fine décidé pou persécute banne croyants qui pé rejette zotte banne traditions. Banne chefs mecquois ti pé faire tuer banne hommes et femmes sans aucun raison valable.

Banne esclaves croyant ti pé sorti depuis différent pays et différent religions. Bilal ène Africain ti le premier Muezzin de l’Islam. So maître Oumayya ti pé oblige li pou renier Allah et croire dans banne idoles. So maître ti faire li allonger lors du sable brûlant et ti mette banne gros roches lors so l’estomac, mais l’esclave Bilal nek ti pé crier Ahad Ahad qui veut dire : « Allah ène seul ». Et zotte ti pé traîne li dans chemin et banne ti zenfants ti pé trouve ça bien amusant pou participe dans ça torture-là. So le corps ti blessé et ti rempli avec du sang mais li ti pé seulement dire “Allah ène seul.” Hazrat Abou Bakr(r.a) ti acheter li et ti libère li et encore les autres esclaves. Yassir ène l’autre compagnon du St Prophète(s.a.w) ti fine trouve la mort après qui zotte ti martyrise li et après so madame aussi fine joine li dans la mort quand Abou Djahal ti perce so poitrine avec ène lance. Banne croyants ti vraiment bien brave pou capave supporte autant douleur et torture. Paroles quran ti pé révéler au St Prophète(s.a.w) et la voix d’Allah ti pé donne assurance banne croyants et faire zotte senti So présence dans zotte les coeurs.

Banne ennemis de l’Islam ti pé attaque le St Prophète(s.a.w) aussi. Ène fois zotte ti passe ène manteau autour so li cou quand li pé faire namaz et zotte ti presque étouffe li quand Hazrat Abou Bakr(r.a) fine sauve li et li fine dire zotte : « Zotte pé rode tuer li parce qui li fine dire qui so seul Maître c’est Allah. » Ène l’autre fois li pas ti capave réléver quand li ti pé faire sajdah dans namaz car zotte ti mette banne entrailles de chameau qui ti pé pourri lors so le dos. Banne voisins ti pé jette banne boute la chair mort banne animaux et les autre saletés dans so la cuisine. Mais ça banne méchanceté-là pas ti empêche li prêcher message de l’Islam, c’est-à-dire qui Celui Qui

fine créer la terre Li Ène. Personne pas digne d'être adoré à part Li. Tous banne Prophètes de tous les temps ti croire en ène seul Dieu et fine prêcher ça même à banne croyants. Banne habitants la Mecque besoin abandonne zotte banne idoles qui pas capave aide zotte ni repousse banne ennemis qui vine attaque zotte, ni même repousse ène mouche qui vine pose lor zotte banne manger qui zotte vine dépose devant zotte idole.

Mais Allah l'Unique, Li vine aide banne qui demande So l'aide, banne qui supplier Li dans la prière. Li déshonore ennemis de banne croyants et honore banne qui croire et qui fidèles. La lumière de l'enseignements de Quran montré banne croyants pou choisir entre le bien et le mal et aide zotte pou choisir le chemin de la droiture. Et pou capave mette ça banne principes-là en pratique banne habitants de la Mecque besoin prier ène seul Dieu.

Pendant treize ans banne croyants fine subir beaucoup souffrances. En plus pendant 3 ans fine impose ene boycott lors le Prophète et so banne compagnons, qui zotte fine besoin alle reste dans ene vallée qui ti appartenir à so chacha Abou Talib. Suite à ça, dans même l'année le Saint Prophète(s.a.w) fine perdi so madame Hazrat Khadija(r.a) et so chacha Abou Talib. Ça l'année-là connu comme 'l'année de la peine'.

Le St Prophète(s.a.w) ti envoye ène soixantaine de musulmans par petit groupes dans ène oasis qui ti appelle « Yaathrib » (Médine). Certains habitants Yaathrib ti déjà converti à l'Islam quand, en 620 et 621, zotte qui ti vinne en pèlerinage à Mecca.

A la fin, Allah ti donne l'ordre au St Prophète(s.a.w) pou immigrer et alle Yaathrib. Le St Prophète(s.a.w) ti quitte Mecca en cachette accompagner de Hazrat Abu Bakar(r.a.). So banne ennemis ti décidé pou tué li ça même jour-là mais quand zotte fine vine rode li, zotte fine trouve Ali(r.a) qui ti pé dormi dans so li-lit. Alors zotte ti envoye dimounes pou alle rode li et celui qui réussi capture li pour gagne ène prime de 100 chameaux. Le St Prophète(s.a.w) et Hazrat Abu Bakar(r.a.) ti trouve refuge dans ène la cave lors colline Thor, qui trouve à peu près à une heure de marche au sud de Mecca. Quelques Mecquois ti trouve zotte trace et Hazrat Abu Bakar(r.a.) ti pé peur pou lavie du St Prophète(s.a.w), mais le St Prophète(s.a.w) ti dire

li « Pas besoin to peur car Allah avec nous » Quand banne ennemis fine arrive devant la cave-là, zotte trouve du fil araignée tisser dans so l'entrée et dans ène nid, quelques œufs de pigeon et zotte pas fine penser pou baisser et guette au fond de la cave.

6. So l'entrée à Médine

Enfin le St Prophète(s.a.w) fine entre à Yaathrib en 622, qui plus tard fine connu comme Médine, la ville du Prophète.

Le Calife Oumar(r.a.) fine commence calendrier musulman avec ça date l'immigration du St Prophète(s.a.w) à Médine en l'an 622. Le St Prophète(s.a.w) alors ti vinne le chef et so premier travail c'est faire ène mosquée en brick et couvert avec feuilles palmier (Mosquée Nabawi). Alors li ti faire ène accord entre musulmans et non-musulmans pou ki tous ensemble, zotte besoin défanne zotte laville contre attaque banne ennemis. Banne Juifs ti éna liberté pou pratique zotte religion et contribuer dans banne dépenses si éna laguerre, et en retour, zotte ti sous protection banne musulmans et le chef, Hazrat Mohammad(s.a.w), ti pé régler banne disputes qui ti pé gagner parfois.

Ti établi ène lien de fraternité entre banne dimounes. Ène partage entre banne réfugiés (Mouhajirines : musulmans de la Mecque) et banne qui ti pé recevoir zotte (Ansaars : musulmans de Médine). Le St Prophète(s.a.w) ti pé encourage banne qui capave lire pou enseigne les autres pou apprene lire et écrire. Communauté-là ti essaye exterminer l'injustice et cruauté. Banne madames ti pé gagne zotte droits. Ti pé prend du-biens avec les riches pou aide les pauvres. Zotte ti pé protéger banne laboureurs contre banne maîtres qui ti pé exploite zotte. Ça communauté-là, sous commandement du St Prophète(s.a.w), ti montrer banne dimounes respecter engagements qui zotte fine prend, ça veut dire, respecter ène parole donné. Ti pé enseigne zotte l'hygiène et comment garde propre banne places public. Bien que la ville entière ti rejette l'adoration de banne idoles et ti accepter adore Allah seulement, zotte pas ti capave amène ène la vie paisible. Certaines arabes qui ti croire juste avec la bouche

mais zotte pas ti sincères, tous les temps ti pé persécute banne vrais croyants et de même banne juifs aussi pas ti manque ène l'occasion pou faire du tort à l'islam et en dehors banne Mecquois ti pé toujours menace banne croyants.

7. Bataille Badr

Dix-huit mois après qui le St Prophète(s.a.w) ti émigrer à Médine, sous prétexte pou protégé ène caravane commercial sous la direction de Abou Soufyan, qui ti pé retourné de la Syrie, banne Mecquois ti lève ène l'armée de mille soldats pou alle vers Médine et zotte ti éna 700 chameaux et 100 chevaux. Le St Prophète(s.a.w) fine gagne nouvelle de zotte banne préparations. Alors le St Prophète(s.a.w) fine sorti avec 313 compagnons qui pas ti banne guerriers et zotte pas ti conner si zotte pé alle vers caravane de Abou Soufyan ou l'armée. Zotte ti réuni 70 chameaux et 2 chevaux. En chemin qui zotte fine conné avec certitude qui l'armée pou attaque zotte. Alors zotte fine dire au St Prophète(s.a.w) :

« Nous pas pou faire coumma banne zenfants d'Israël qui ti dire à Moïse : 'Alle combattre avec to Seigneur ; nous, nous pou attanne toi ici.' Si nous éna pou la guerre nous pou devant toi, derrière toi, dans to côté gauche et dans to côté droite. C'est sûr qui banne ennemis éna désir vine jusqu'à toi ; nous donne toi l'assurance qui zotte pou arrive côte toi seulement quand zotte fine passe lors nous les corps morts. »

Banne musulmans fine arrête côte puits Badr et toute la nuit le St Prophète(s.a.w) fine prier avec beaucoup ferveur et li ti pé tracasser. Allah fine écoute so la prière et Allah fine envoye ène gros la pluie et l'orage. La pluie qui ti tomber fine trempe le sable cotte banne compagnons du St Prophète(s.a.w) ti été et le sable ti vine humide et banne guerriers-là ti gagne facilité pou marcher. Tandis qui dans camp ennemi la terre fine vine la boue et banne chameaux et cheval pas ti pé capave déplacer. Banne compagnons du St Prophète(s.a.w) ti montrer beaucoup fermeté et bravoure. Éne général l'armée musulmane Abdoul Rahman ti trouve deux garçons musulman bien jeune à so côtés. Li fine penser comment pou capave combattre avec deux jeunes garçons sans

expériences. Pendant même qui li ti pé pense ça, ène jeune-là touche so coude et demande li côte Abou Jahal qui habitué tourmente le St Prophète(s.a.w) et l'autre garçon-là aussi fine pose li même question. Alors Abdoul Rahman fine montrer zotte Abou Jahal qui bien armé et entouré de so banne généraux. Alors tous les deux fine fonce lors Abou Jahal et fine blesse li. Banne ennemis ti coupe le bras ène garçon qui ti pé attaque Abou Jahal-là. Ti éna ène grand bataille et beaucoup habitants de la Mecque ti trouve la mort. Camp ennemi fine paniquer et zotte fine sauver et zotte ti laisse derrière zotte 70 morts et à peu près 70 prisonniers. Le St Prophète(s.a.w) ti faire enterre banne morts dans ène puits sec. Et l'islam ti vine en puissance. Et bataille Badr pou toujours reste dans l'histoire comme la victoire du mal sur le bien.

8. Bataille d'Uhud

Banne habitants la Mecque ti tellement humilier quand zotte ti perdi bataille Badr qui zotte ti empêche banne dimounes pleuré pou banne qui fine mort. Pou venge zotte banne morts zotte ti pé faire banne grand préparation. Ène Juif de la Mecque Kaab bin Achuraf ti pé excite banne les autres tribus dans les environs et zotte ti pé envoye banne guerriers pou vine prend part dans la guerre contre banne musulmans. En l'an 3 de l'hégire, trois mille soldats et parmi zotte sept cents qui éna banne armures en fer et 2 cents qui ti lors cheval fine alle attaque Médine. Le St Prophète(s.a.w) fine réuni mille volontaires qui ti éna seulement 2 cheval. Zotte ti refuse l'aide ène groupe juif parce qui ça banne juifs-là ti en contact avec banne mecquois qui contre banne Medinois. Plus de trois cents hypocrites fine quitte l'armée du St Prophète(s.a.w). Le St Prophète(s.a.w) fine faire so armée deboute contre montagne Uhud et faire face l'ennemi. Li ti mette aussi 50 archers (bannes ki tire flèches) pou surveille ène passage important et ti recommande zotte pas quitte zotte poste sous n'importe ki prétexte. Dans premier partie bataille banne musulmans fine repousse banne idolâtres et ti oblige zotte reculer et sauver. Lère ban musulmans trouver qui banne ennemis pé sauver, la plupart de banne archers, malgré ki zotte ti gagne l'ordre pou pas quitte zotte poste, fine désanne dans la plaine. Banne Quraish, sous le commandement de

Khalid-Bin-Waleed et 'Amr bin al 'As fine profite de ça situation-là. Zotte fine faire demi tour et fine tuer banne archers ki ti reste en garde et zotte fine attaque banne musulmans depuis ça place-là. Et les autres guerriers idolâtres ti vinne joinne zotte et fine attaque banne musulmans, ki fine subir beaucoup de pertes. Éne ti groupe compagnons du St Prophète(s.a.w) ti pé protégé li contre flèches banne ennemis. Abu-talha fine perdi so la main quand li ti pé protege le visage du St Prophète(s.a.w). Le front du St Prophète(s.a.w) ti blesser par ène roche lancé par l'ennemi et ène lotte coup fine faire so casque enfonce dans so la joue et le St Prophète(s.a.w) fine perdi connaissance parmi banne morts et so banne compagnons fine réussi amène li dans ène coin montagne Uhud. Plus tard banne musulmans fine regrouper et fine retourne lors champ de bataille mais banne infidèles ti fine déjà reculer. Seulement parcequ quelques compagnons du St Prophète(s.a.w) pas ti suivre l'ordre qui ti donné, banne musulmans fine subir beaucoup de pertes : 70 compagnons ti vinne martyrs. Banne Mecquois ti prend le nez et zoreille banne cadavres pou faire colliers.

Mais banne compagnons du St Prophète(s.a.w) ti éna ène grand l'amour pour lui. Quand li fine retourne à Médine, le St Prophète(s.a.w) fine exprime so condoléance à ène madame bien âgé ki fine perdi so garçon dans la bataille. Madame-là fine réponde li : « Quand mo fine trouve ou encore vivant, mo oublier tout mo malheur. »

9. Boisson alcoolisé interdit

Après bataille Uhud, Islam ti éna grand l'influence lors banne croyants. Banne Arabes ti banne grand soulards. Toute la journée zotte ti pé boire et pou faire zotte perdi ça l'habitude-là pas ti ène travail facile. Mais dans 4ème année de l'hégire, Allah fine envoye commandement à travers le St Prophète(s.a.w) pou interdire banne boissons alcoolisé. Alors le St Prophète(s.a.w) fine ordonne so banne compagnons pour alle annonce ça nouvelle-là à travers Médine. Dans la case ène musulman Médine ti éna ène reunion cote beaucoup dimounes ti pé boire, zotte ti fini ène pot et commence alle ouvert ène l'autre. La plupart ti soulards et pas ti

pé raisonner. Éne coup zotte fine entendre ène dimoune ki pé crier ki à partir de maintenant pas gagne droit boire l'alcool, parce qui c'est ène l'ordre ki Allah fine donner. Éne parmi zotte dire mo croire c'est ène proclamation, à nous alle renseigner. Éne lotte deboute donne ène coute bâton et casse pot du vin-là et li dire :

« Premier nous obéir et puis nous alle renseigner. Nous fine tander, ça même assez : li pas bon qui nous boire et en même temps nous alle rode renseignements. Plutôt laisse du vin tomber avant, après nous alle renseigner. »

Et c'est coumme ça ki le St Prophète(s.a.w) fine faire disparaître l'alcool dans la société musulmane.

10. Bataille de fossé

En l'an 5 de l'hégire, Abou-Soufyan ti organise ène grand expédition de 24,000 hommes avec l'aide banne les autres grand tribus contre Médine. Quand le St Prophète(s.a.w) fine prend connaissance de ça rassemblement-là, li fine décide pou attanne banne ennemis dans la ville Médina ki ti protéger dans trois côtés, soit par banne remparts, soit par banne lacases ki ti à côté l'un de l'autre, soit par banne plantation palmiers, et à ène ti distance, par banne Juifs Banu Quraida ki ti éna ène pacte avec banne Musulmans (c'est-à-dire qui zotte ti d'accord pour laguerre pou banne musulmans si besoin). Seul côté nord ti exposer. Le St Prophète(s.a.w) sous indication de Salman le persan, ti fouille ène long fossé de ène mile de long et 10 pieds de large. 3000 hommes, femmes et enfants ti travaille bien dure pou faire ça fossé-là. Quand banne ennemis ti pé rapprocher, le St Prophète(s.a.w) fine retourne banne qui pas pou prend part dans la guerre et fine reste avec 1200 hommes pou attanne l'attaque de banne incroyants. Banne ennemis fine pose zotte camp tout près de tranchée-là et ça ti pé faire banne compagnons du St Prophète(s.a.w) tracasser. Banne ennemis ti lors ène hauteur et zotte ti pé envoye flèches lors banne musulmans et zotte ti essaye traverse fossé, la nuit et le jour. Avec beaucoup la peine, banne musulmans ti repousse banne

ennemis mais quand même ène groupe cavaliers ti réussi traverse fossé et ti prend contacte avec banne Médinois. Chef l'ennemi, Nawfal, ti trouve la mort et les autres ennemis fine sauver. Banne Mecquois ti offert 10,000 dirhams pou gagne so lé-corps, car zotte ti peur ki ban musulmans mutile so lé-corps coumma zotte ti faire avec lé-corps de banne musulmans dans bataille Uhud. Couma l'islam fine enseigner, nous pas gagne droit mutile ène cadavre, alors le St Prophète(s.a.w) fine ordonne retourne le corps Nawfal à so banne compagnons.

Puis banne ennemis ti rentre en contact avec banne Banu Quraida qui fine accepté ki, aussitôt ki banne idolâtres traverse le fossé, zotte pou attaque banne musulmans par derrière, après ki zotte pou massacrer banne femmes et enfants. Kala du St Prophète(s.a.w) fine trouve ène espion juif qui ti pé rode ène chemin pou traverse fossé du côté de banne musulmans et li fine tuer li.

Quand le St Prophète(s.a.w) fine conné qui banne juifs fine trahi zotte, li fine envoie 500 hommes pou alle surveille quartier banne madames et enfants et protège zotte. Situation ti bien critique mais Allah fine vine à zotte l'aide. Ène juif de la tribu Ghatafaan, Nu'aim, qui ti senti li attiré vers l'islam fine saisi l'occasion pou aide banne musulmans. Li ti conseille banne Juifs de Banu Quraida pou réclame banne otages Mecquois attention qui banne Mecquois abandonne zotte si zotte batte en retraite. Et à banne Mecquois li fine dire zotte qui banne Juifs de Banu Quraida pou certainement prend banne otages Mecquois pou livrer zotte à banne musulmans. Effectivement quand banne Juifs de Banu Quraida fine exige en garantie banne otages, banne Mecquois fine commence méfier zotte. Déjà vingt jours d'hiver fine passé et banne Mecquois ti pé commence énervé. Et en plus Allah vine envoie ène du-vent bien fort et bien glacé ki fine vine casse zotte la tente, devire zotte marmite et éteigne zotte du feu. Couma ti pé faire noir certains ti commence ramasse zotte banne z'affaires et retourné et d'autres ti pé penser ki banne musulmans ti pé attaque zotte. Bientôt zotte tous fine paniqué et chacun fine sauver dans tout direction. Abou Soufyane fine monte lors so chameau ki encore attacher pou sauver. So camarade fine vine largue so la corde. Et le lendemain tout ennemi fine quitte la plaine et fine sauver.

Cependant banne alliés ennemi ti toujours en majorité même si zotte pas ti réussi prend Médine par zotte banne actions et avec aide banne Juifs zotte ti rendre la vie banne musulmans bien difficile. Parfois banne tribu Ghatafaan ti pé capture chameaux banne musulmans et d'autres fois tribu Fazaara pé attaque banne Musulmans et coquin zotte. Ène fois le St Prophète(s.a.w) ti envoie ène patrouille en reconnaissance et zotte ti tombe dans l'embuscade. Seul le chef Mohammad bin Masalma ti retourne en vie à Médine pou faire so rapport.

11. Traité Houdaïbya

Ça l'époque-là Allah ti fini promette au Prophète(s.a.w) qui so reve pou réaliser c'est-à-dire li pou accompli le tour du Ka'aba :

« En vérité, Allah fine réalise clairement pou So Messager so Vision. Certainement, zotte pou rentre dans la Sainte Mosquée, si Allah oulé , en toute sécurité, *éna* zotte la tête rasé, *les autres* zotte cheveux coupé au ras; zotte pas pou éna aucun crainte. Mais Li ti conné ça ki zotte pas ti conné. Donc, Li finne destine pou zotte, à part ça, ène la victoire proche. » (Quran 48:28)

Dans ça vision-là Allah fine prédire zotte victoire proche qui pour vine avant la conquête de la Mecque. Le St Prophète(s.a.w) avec mille cinq cents pèlerin qui ti armé seulement de sabre ti prend la route vers Mecca et li ti pé dire so l'intention pour alle faire le tour de la Ka'aba. Traditionnellement, le circuit de la Ka'aba li ti ène droit universel, c'est-à-dire qui tous dimounes ti libre pour faire le circuit. Cependant l'armée Mecquois fine averti les autres tribus autour et zotte fine barre la route banne musulmans. Alors les musulmans fine faire ène lé-tour et zotte fine camper à Houdaïbya pas trop loin de Mecca. Plus tard banne délégués Mecquois fine éna ène rencontre avec le St Prophète(s.a.w) et en même temps banne tribus qui ti alle avec banne ennemis ti pé menace pou quitte banne Mecquois parce qui zotte ti refuse donne droit banne musulmans pou alle faire le tour de la Ka'aba. Alors banne infidèles ti obliger négociateur. Hazrat Mohammad(s.a.w) ti envoie Uthman(r.a) pou rassure banne Mecquois qui

zotte ti vinne en paix. Banne parents proches de Uthman(r.a) fine invite li pou alle faire le tour de la Ka'aba mais li fine refuser . Li fine dire qui mo pou accomplir le circuit seulement avec mo maitre alors banne mecquois fine répande partout qui zotte fine assassine Hazrat Uthman(r.a). Hazrat Mohammad(s.a.w) fine assise dans l'ombrage en bas ène pied et fine rassembler tous so banne compagnons et fine adresse zotte li finne dire zotte qui « La vie de ène ambassadeur li sacré pou tous nations et mo fine apprend qui zotte fine tuer Uthman. Si li vrai nous pou besoin rentre dans Mecca coute que coute. Jure moi qui si nous alle de l'avant, nous pou sorti victorieux. » Et zotte tous fine prend la main et fine jure fidélité. Le 'Serment sous l'arbre' fine reste célèbre dans l'histoire. A peine zotte fine faire ça serment-là qui Hazrat Uthman(r.a) fine retourner en bonne santé. A la fin banne Quraiche fine envoye Souhail bin Amr pou signe ène traité avec banne musulmans. Ça pacte-là engage tous les deux groupes qui zotte d'accord pou observe ène trêve de dix ans côte tout dimounes pou en sécurité et pou respecter zotte prochain. Et en plus si ène Quraiche vine dans le groupe du St Prophète(s.a.w) sans l'autorisation de so maitre, alors le St Prophète(s.a.w) pou retourne li à so maitre ; mais si ène musulman alle vers l'ennemi zotte pas pou retourne li et l'année suivant banne musulmans pou gagne permission alle faire le tour de la Ka'aba. Ça l'accord-là ti faire banne musulmans bien en colère parce qui zotte ti senti zotte humilié. Zotte fine faire le St Prophète(s.a.w) conne sentiment de banne musulmans. Alors le St Prophète(s.a.w) fine dire qui ène vrai croyant li pou prêcher so la religion n'importe côte li pou être tandis ki celui ki quitte l'Islam li pas pou éna aucun utilité pou l'Islam. A peine ça traité-là fine signer qui Abou Djandal, le fils de Sohail fine converti et fine vine devant le St Prophète(s.a.w) et supplier li pou prend li et délivrer li de so papa qui ti pé maltraite li. Sohail ti insister pou suivre l'accord qui ti signer. Alors, le St Prophète(s.a.w) fine obligé retourne garçon-là mais li fine dire li : « To besoin endure avec patience et éna confiance en Allah, certainement Allah pou faire ène façon pou libère toi et banne qui opprimé et qui dans même situation qui toi. »

Après ène l'autre converti fine joindre le St Prophète à Médine et alors le St Prophète fine remette li à deux Mecquois pou zotte retourne li à Mecca.

Quand zotte ti pé retourner li fine tuer ène so gardien et fine trouve refuge près côte la Mer Rouge, côte banne caravanes Mecquois ti pé faire commerce avec la Syrie. Mais le St Prophète ti refuse retourne ène madame qui ti sauver et qui ti vinne à Medine car le St Prophète fine dire banne madame pas ti mentionné dans ça traité-là.

En attendant soixante-dix musulmans qui ti sauver depuis camp banne idolâtres ti joindre Abou Basir et zotte ti pé faire banne embuscades et ti pé prend convoi banne ennemis qui ti pé passe dans zotte l'endroit. Banne Quraiches ti fini par demande au St Prophète(s.a.w) pou garde banne musulmans qui pé sauver de Mecca. Grâce à ça traité-là fine gagne encore banne nouveaux convertis comme Khalid-bin-Walid et Amr-bin-Al 'As.

12. Lettres aux Souverains

Après ça le St Prophète(s.a.w) fine faire ène plan pour propage l'Islam. Li fine adresse banne lettres ki ti éna so stamp 'Mohammad Rassoul Allah' (Mohammad le Prophète d'Allah) à banne les rois : le roi Négus de l'Abyssinie, le roi de l'Égypte et fine invite zotte pou accepter l'Islam. Quand ène ambassadeur de l'Islam qui ti appelle Dihya ti présente li devant empereur romain Héraclius, li fine dire li prosterner devant li. Mais Dihya ti refuser et li fine dire à l'empereur qui ène musulman pas gagne droit prosterner devant ène humain. Alors Héraclius fine faire interprète lire ça lettre-là pour li. Puis Héraclius fine faire vine Abou-Soufyan, qui ti ène grand ennemi du St Prophète(s.a.w), et quelques uns de so compagnons qui ti dans la ville, pou pose zotte questions lors le St Prophète(s.a.w). Li fine dire à banne les autres Arabes : « Si li(Abou Soufyan) pé cause menti, corrige li. »

Voici commentaire qui l'empereur fine faire après qui li fine cause longuement avec Abou Soufyan :

« Mo fine demande zotte si li vine depuis ène famille noble et zotte fine réponde 'oui', et banne Prophètes toujours descende de banne familles noble. Mo fine demande zotte si li pé dire même quitte chose

qui ène l'autre fine dire avant li, et zotte fine réponne 'non'. Mo fine demande zotte si dans so famille éna le roi, zotte fine réponne 'non', car mo ti capave pensé qui li pé rode rang de so banne ancêtres. Zotte fine réponne 'non' qui jamais li pas fine cause menti même avant li déclare li Prophète. Mo arrive à la conclusion qui si ène dimoune pas cause menti lors banne humain, li pas possible qui li cause menti lors Bon Dieu. Mo fine demande zotte si c'est banne grand et riche qui pé accepter li, zotte fine réponne 'non' c'est banne pauvres et faibles, et tous les temps li ainsi avec les Prophètes. Lers mo fine demande zotte si so banne partisans pé augmenter ou diminuer, zotte fine réponne 'pé augmenter' et c'est ainsi quand banne dimounes gagne la foi. Mo fine demande zotte si banne qui fine croire, développe la haine pour l'Islam, zotte fine réponne 'non'. Mo fine demande zotte si li pas tenir so promesse et so banne engagement et zotte fine réponne 'non'. De même, tous banne Prophètes zotte loyals. Ensuite mo fine demande zotte qui résultat la guerre entre zotte et li. Zotte fine réponne : 'parfois dans nous faveur, parfois dans so faveur'. Ça c'est le sort de banne Prophètes : dans commencement zotte suivants subir banne difficultés et banne malheurs, mais à la fin zotte gagne victoire. Mo fine demande zotte qui li pé prêcher, zotte fine réponne-moi qui li pé dire adore Allah tout seul et rejette tous idoles et pas associer personne à Allah et observe la prière, dire la vérité et reste chaste. »

Alors l'empereur Héraclius fine dire: « Si zotte pé dire la vérité, so l'influence pour vine jusqu'à nous territoire. Mo ti conné qui li pou vini mais mo ti ignorer qui li pou vine parmi zotte. » Héraclius fine croire dans la véracité du St Prophète(s.a.w) et li ti sûr de so succès.

Et quelques rois arabes fine converti à l'Islam. Maquoqis, le roi d'Égypte ti envoie banne présents bien précieux au Prophète(s.a.w). Négus fine réponne lettre-là bien poliment. Mais Chosroès de Perse ti déchire lettre d'invitation-là. Banne Juifs qui ti alle installe zotte en Iran, ti faire banne fausse propagande lors l'Islam et c'est pourquoi qui Chosroès fine influencé par ça et fine réagir avec colère. Badhaan, gouverneur de Yémen ti gagne l'ordre de Chosroès pour envoie deux hommes pour arrête le St Prophète(s.a.w) et pou amène li en Iran. Quand zotte fine arrive à Médina,

le St Prophète(s.a.w) fine dire zotte retourné le lendemain et écoute en personne révélation qui Allah fine donne li. Révélation-là ti comme suit :

« Nous pou faire so garçon alle contre li, li pou assassine so papa le 10 Jummadoul-oulaa. »

Peu après qui Badhaan fine gagne nouvelle de ça révélation-là, li fine gagne ène lettre de l'empereur de l'Iran avec ène nouveau sceau (stamp). Dans lettre-là fine écrire:

« De Chosroès Siroès à Badhaan, gouverneur du Yémen : mo fine assassine mo papa parce qui li ti vine corrompu et très méchant. Li ti pé assassine banne nobles et ti pé traite so banne sujets bien cruellement. Coumma gagne ça lettre-là, rassembler tous banne officiers et demande zotte faire serment qui zotte pou fidèle à moi. L'ordre qui mo papa ti donné pou arrête ène Prophète fine annuler. »

Badhaan et so banne camarades ti tellement impressionner par ce qui fine arriver qui zotte tous fine accepter l'Islam.

13. La chute de Khaïbar

Cinq mois après qui le St Prophète(s.a.w) fine retourne de Houdaïbya, li fine décide pou retire tous banne Juifs de la ville de Khaïbar. Khaïbar ti environ 500 kilomètres au nord de Médina et li ti facile pour zotte faire banne complots contre l'Islam de là-bas. Le St Prophète(s.a.w) ti aussi faire ène chemin pour banne caravanes traversé et ainsi casse banne blocus qui banne Juifs de Khaïbar et de la tribu Ghatafaan ti imposé. Avec 1600 hommes, le St Prophète(s.a.w) fine marche lors Khaïbar, côte ti éna sept châteaux forts. En plus de 20,000 combattants, banne ennemis ti possède aussi banne armement très perfectionné comme banne catapultes. Malgré ça ène par ène banne forteresses-là fine tomber, jusqu'à qui tous banne juifs fine retire zotte dans forteresse centrale. Zotte ti repousse tous attaques jusqu'à qui le St Prophète(s.a.w) fine gagne révélation pour remette drapeau à Hazrat Ali(r.a) qui fine lance banne guerriers à l'attaque. Avant la tombée de la nuit, zotte ti réussi conquérir dernier forteresse. Banne Juifs fine accepter tout de suite pou travail pou banne vainqueurs. Le Prophète(s.a.w) fine faire ène

accord avec zotte qui banne musulmans pou capave renvoye zotte quand zotte oulé.

A ça l'occasion-là, le St Prophète(s.a.w) fine épouse la veuve de Kinana ki ti ène chef de Khaïbar et ça madame-là ti éna ène grand marque noir côte so li yeux. Li fine raconte le St Prophète(s.a.w) coumma li fine gagne ça marque noire-là : quelques jours avant madame-là ti rêver qui la lune ti tombe dans so giron (god) et quand li fine raconte ça rêve-là à so missié, missié-là fine donne li ène grand coup et fine dire li : « To pé désire épouse le roi de l'Arabie ? » , car la lune c'est l'emblème de l'Arabie. Rêve de Saffiya fine montrer la véracité du St Prophète(s.a.w). C'est aussi ène signe qui Allah révèle le futur à So banne serviteurs à travers banne rêves.

Pendant ça bataille-là, ène berger qui ti pé passé avec moutons de ène chef juif, fine accepté l'islam. Berger-là fine dire au St Prophète(s.a.w) qui li tracasser car li pas pé réussi retourne banne moutons-là à so maître. Alors le Saint Prophète(s.a.w) fine dire berger-là mette banne moutons-là face à Khaïbar et pousse zotte. Allah pou conduire zotte vers zotte maître. Le St Prophète(s.a.w) ti connais pourtant qui ça banne moutons-là capave servi comme nourriture pour banne Juifs alors qui zotte ti enfermé dans zotte forteresse. Mais li fine montré par so beau geste combien li important pour retourne ène du-bien qui ène dimoune fine donner pour garder à so propriétaire.

Avant qui le St Prophète(s.a.w) quitte Khaïbar, ène madame juif qui ti appelle Zainah bint Al-Harith ti offert li ène zépaule cabri qui ti so mets préféré. Mais madame-là ti empoisonne ça mangé-là. Le St Prophète(s.a.w) fine mange ène boute après li fine crache li. Ène so compagnon Bichr fine mangé aussi mais li fine mort. Madame-là fine dire qui li ti perdi so banne proches dans bataille et li fine décide pour empoisonne le Prophète en disant : « Si li ène imposteur, li pou ène bon débarras, et si li ène Prophète, Dieu pour sauve li. » Le Saint Prophète(s.a.w) ti pardonne madame-là, malgré qui li ti mérite la peine de mort.

14. So vision fine réalisé

Ti éna ène accord qui un an après signature de traité de Houdaïbya, le St Prophète(s.a.w) et so banne compagnons pour capave accomplir le tour de la Ka'aba. Donc en l'an 7 de l'hégire, le St Prophète(s.a.w) fine prend chemin vers Mecca à la tête de ène l'armée de deux mille musulmans. Zotte ti quitte zotte armes à la limite de territoire de la Mecque et fine avance vers la ville sainte avec seul arme qui ène voyageur éna, c'est-à-dire zotte l'épée dans so fourreau. Pour banne réfugiés-là ça ti ène moment de grande émotion car après 7 ans zotte fine retourne dans zotte la ville natale. Banne Quraiche ti respecter pacte qui zotte ti faire et pendant trois jours zotte fine évacuer la ville et observe banne musulmans de loin. Le St Prophète(s.a.w) et so banne disciples fine embrasse roche noire et zotte fine accompli 7 fois le tour de la Ka'aba. Après zotte fine faire le parcours entre les collines 'Safaa' et 'Marwa'.

Banne Mecquois ti écoute avec mépris quand zotte fine tende la voix fort de Bilaal, l'esclave noir libéré, quand li fine donne Azhan pour la prière après Midi. Zotte ti souhaité qui ène catastrophe tombe lor le St Prophète(s.a.w) qui pé honore so Dieu Unique et pé délaisse zotte trois déesses de la Ka'aba, mais narien pas fine arrivé.

Le Prophète(s.a.w) ti célébrer so dernier mariage avec ène veuve Mecquoise, Maïmouna bint Al-Harith, belle sœur de so chacha Abbaas. D'après l'histoire, nous trouver qui tous banne madames du St Prophète(s.a.w) ti éna beaucoup de dévotion pour li. Et Maïmouna aussi ti parmi zotte. So dernier souhait à la veille de so la mort, alors qui li ti âgé de 80 ans, c'est qui enterre li à l'endroit près de la Mecque côte li ti camper avec le St Prophète(s.a.w) juste après so mariage.

15. Bataille Mouta

Le St Prophète(s.a.w) ti entende dire qui banne tribus chrétien lors frontière la Syrie et zotte pé prépare zotte pour attaque banne musulmans de Médine. Banne Juifs et banne incroyants ti pé pousse banne Chrétiens

pour faire la guerre. Le St Prophète(s.a.w) fine envoie 15 hommes pour gagne banne renseignements exact. Lers zotte fine trouve ène l'armée lors la frontière la Syrie, au lieu qui zotte alle informe le St Prophète(s.a.w) zotte fine resté pour propage le message de l'Islam. Banne soldats ennemis fine tuer tous les 15 malgré qui zotte ti défende zotte. Plus tard, le St Prophète(s.a.w) fine apprend qui troupe-là fine dispersé.

Cependant le St Prophète(s.a.w) fine écrire au chef de la tribu ghassanide, qui ti sous Byzance (l'Empire Romain en orient), pour mette li au courant de banne préparations qui ti pé faire à la frontière syrienne et du massacre de 15 musulmans qui ti allé pour enquête lor-là. Le St Prophète(s.a.w) ti envoie Al-Harith pour amène ça message-là, mais dès qui li fine rentre dans territoire de la tribu ghassanide, Cherhabil, qui ti gouverneur de ça pays-là, fine donne l'ordre pour tué li. Cherhabil ti aussi complice dans meurtre de banne 15 premiers musulmans-là et li ti gagne peur qui so chef alle conne sa. Pou venge la mort injuste de so messenger et de so 15 éclaireurs, le St Prophète(s.a.w) fine lève ène l'armée de 3000 combattants sous commandement de Zaid bin Harith, so esclave affranchi. Li ti mette Djafar pour remplace Zaid si arrive li quittechose et de même, li ti mette Abdoula Rawaaha pour remplace Djafar, et si Abdoula Rawaaha aussi li trouve la mort, banne soldats besoin choisir ène chef zotte-même.

Un juif de parmi banne curieux fine faire la remarque :

« O Aboul Quaasim(surnom de Mohammad(s.a.w)) ! Si vraiment to Prophète, banne qui to fine désigné pour sûrement trouve la mort parce qui Dieu réalise paroles de ène Prophète. » et li fine tourne vers Zaid et li fine dire li : « Croire moi ! Si Mohammad vrai, to pas pou retourne de ça expédition-là. » et Zaid qui ti ène bon croyant fine réponde : « Qui mo retourne vivant ou pas, Mohammad est le Prophète d'Allah. »

L'armée fine prend la route nord et le St Prophète fine accompagne zotte jusqu'à col des adieux côte li fine donne zotte banne dernière recommandations :

« Mo exhorte zotte pour gagne frayer d'Allah et traite bien banne participants musulmans. Combatte au nom d'Allah et combatte en Syrie contre So banne l'ennemis qui aussi zotte l'ennemis. Là-bas zotte pour rencontre aussi banne qui rappelle Dieu dans zotte lieu de prière. Laisse-zotte en paix. Pas attaque banne madames, banne enfants, banne aveugles et banne vieillards. Pas coupe banne arbres et pas détruire banne monuments. »

L'armée musulmane fine avance plus loin. A Mouta, au sud de la mer rouge, l'armée musulmane ti trouve l'armée Byzantine en chemin et ti éna 100 mille hommes et 100 mille bédouins avec zotte. Zaid fine trouve la mort dans ça bataille-là et Djafar fine prend commandement de l'armée musulmane. Li fine descende de so monture et fine marcher pou faire face banne ennemis. So la main droite ti fine trancher et Djafar fine prend drapeau musulmane avec so la main gauche. Et quand li fine perdi so la main gauche li fine pose drapeau lors so poitrine appuyer par so banne avant bras sanglant et li fine mort ène martyr. Abdullah alors fine remplace li et li aussi fine trouve la mort. Et Khalid fine prend commandement l'armée musulmane et fine continuer combattre jusqu'à qui la nuit fine tomber. Et le lendemain li fine faire quelques changements de position et fine faire banne guerriers qui ti très fatigués lance quelques slogans pendant bataille pour faire croire qui l'armée musulmane fine gagne beaucoup renfort. L'armée byzantine fine tombe dans le panneau et zotte fine reculer. Khalid fine alors décide pou retourne banne survivants à Médina. Hazrat Muhammad(s.a.w) ti fini gagne révélation concernant banne epreuves qui so l'armée pé traverser. Li fine rassembler banne musulmans dans mosquée et larmes dans so li-yeux li fine annonce la mort de Zaid, Djafar et Abdullah bin Rawaha, et qui Khalid fine relève drapeau musulman et fine sauve zotte l'armée. « C'est ène l'épée parmi banne l'épées D'Allah. » Et de ce jour-là Khalid ti connu sous le nom de Saifullah, l'épée d'Allah.

16. Conquête de Mecca

Dans traité qui le St Prophète(s.a.w) fine conclure avec banne mecquois ti

éna qui zotte pas pou combattre et pas pou aide banne alliés pou combattre. Ça pacte-là ti précise position de tribu Khouza 'a dans camp Médina et de tribu Bakr dans camp Mecca. En l'an 8 de l'Hégire, (novembre 629) tribu Bakr fine attaque tribu Khouza 'a près de Mecca. Zotte ti poursuiवे et massacre plusieurs d'entre zotte. Banne Khouza 'a fine envoie 40 hommes à Medina pou rapporte au St Prophète(s.a.w) qui tribu Bakr fine casse zotte traité et zotte ti demande li so l'aide. Alors le St Prophète(s.a.w) fine promettre pou aide zotte dans zotte malheur. Abou Soufyan qui ti délégué par banne mecquois pou gagne ène prolongation de trêve, fine retourne sans succès.

Après ça trahison-là le St Prophète(s.a.w) fine organise ène expedition. Li fine demande banne musulmans de Medine pou prend armes et tenir zotte prêt et ti faire appel à tous les Arabes qui ti converti en Islam. Après le St Prophète(s.a.w) fine alle avec ène grand armée qui ti pé grossi en cours de route par banne les autres tribus qui ti pé joindre zotte. Abbas oncle du St Prophète(s.a.w) fine quitte Mecca avec so famille et fine alle joindre l'armée à Djoufa côte li fine converti à l' Islam. Après quelques jours de marche l'armée musulmane fine entre dans le desert de Farhan et pareil coumma Hazrat Suleiman(a.s) ti prédire, nombre de compagnons ti arrive à 10 mille.

Abou Soufyan, accompagné de Hakim Bin Hizam et Boudail bin Warqua, ti sorti de Mecca en reconnaissance. Dans le silence et l'obscurité de la nuit, zotte ti pé tracasser en voyant banne feux qui ti allumé devant banne la tente du camp musulman. Et Abou Soufyan ti rencontre Abbas qui fine persuade li pou accompagne li côte le St Prophète(s.a.w). Le St Prophète(s.a.w) fine dire prend soin de Abou Soufyan et retourne avec li vers l'heure de la prière du matin. Et au lever du jour Abou Soufyan trouve tous banne campeurs tous ensemble commence bouger. Éna pé alle cherche de l'eau et les autres pé forme banne rangs. Abou Soufyan fine peur et li croire qui banne musulmans pé faire quitechose pou intimide li. Abbas fine rassure li et fine dire li qui zotte pé alle faire namaz et zotte tous fine suivre les mouvements du St Prophète(s.a.w). Alors Abou Soufyan fine dire : « Mo fine trouve banne suivants de Chosroës et de César mais jamais mo pas fine trouve dimoune aussi dévoué à zotte chef coumma banne musulmans dévoué à zotte Prophète. » Après namaz, Abou Soufyan fine vine devant le St

Prophète(s.a.w) et le St Prophète(s.a.w) fine dire li : « Est-ce qui to reconnaître pas éna personne pou adorer à part Allah. » En prenant nom so parent Abu Soufyan fine faire serment, li fine dire : « Ou fine toujours bon et gentil envers les musulmans. Mo sûr qui si ti éna les autre bon dieux en dehors Allah zotte ti pou vine à mon aide. Alors le St Prophète(s.a.w) fine dire li : « Est-ce qui to reconnaître qui mo ène Messenger d'Allah. » Et li fine répondre mo éna encore certaine reserve lors ça sujet-là. » Et tandis qui Abu Soufyan ti pé hésiter encore so deux compagnons fine accepter l' Islam et après li-aussi fine converti. Le St Prophète(s.a.w) fine alors proclamer qui tous banne qui pou cherche refuge dans la case de Soufyan pou en sécurité, tous banne qui pou cherche refuge dans la Ka'aba et tous banne qui pou dépose zotte armes et pou ferme zotte la porte et tous banne qui pou reste dans la case Hakim pou en sécurité.

Le St Prophète(s.a.w) fine remette ène pavillon à Abou Rouwayha et fine demande Bilall pou marcher et annoncer qui tous ça qui sous ça pavillon-là, pou gagne la paix. Ça ti ène douce revanche qui Bilall fine invite banne qui ti pé persecute li à la sécurité.

Abou Soufyan ti assister défilé l'armée musulmane et ti pose question sur chaque dimoune qui ti traverser. Li fine étonner pou trouve tribu Achedja, parce qui zotte ti plus grand ennemis du St Prophète(s.a.w). Alors Abbas fine dire li qui Allah de par So grâce fine faire les coeurs banne ennemis accepter l' Islam. Sans plus tarder Abou Soufyan fine rentre dans Mecca, li fine deboute devant la Ka'aba li fine dire devant banne Quoraiches qui garantie qui le St Prophète(s.a.w) fine donne à banne qui pou dépose armes. Abou Soufyan so madame pas pé accepté qui so missié pé encourage dimoune pour cède à banne musulman et ti incite la foule pou tuer so missié. Mais devant la force de banne musulmans, zotte tous fine dispersé pour alle dans zotte là-case.

L'armée musulmane dirigé par Khalid ti avance vers partie éloigné de Mecca. Et l'armée qouraiches dirigé par Ikrama garçon de Abu Jahal fine attaque l'armée musulmane. Khalid fine dérouté zotte et fine tuer seize d'entre zotte. Hazrat Muhammad(s.a.w) avec l'aile gauche ti rentre dans la partie haute Mecca et pas ti éna résistance. C'est comme ça qui

le Prophète(s.a.w) fine remporte ène grand triomphe presque sans violence. Et ensuite le St Prophète(s.a.w) fine alle vers Ka'aba li fine monte lors so chamelle et fine faire 7 tours de Ka'aba et fine touche la pierre noire (Hajrè Aswad) avec so bâton. Et le Prophète(s.a.w) fine rentre dans la Ka'aba et fine brise 360 idoles qui ti là-dans. Et à chaque fois qui ène idole ti pé tomber Hazrat Muhammad(s.a.w) ti pé lire ça verset Coran-là :

“La vérité fine vini et le mensonge fine disparaître. Certainement le mensonge disparaître vite.”

Ça verset-là ti révéle avant qui le St Prophète(s.a.w) ti quitte Mecca pour Medina et trouve dans le chapitre Bani Israïl et encore éna ène l'autre doah qui ti prophétise le départ du Prophète et so retour avec succès.

“Et dire : ô mon Seigneur faire qui mo l'entrée honorable et mo départ honorable et accorde-moi de To part ène puissance protectrice.” Ça jour-là ti mémorable car promesse qui Allah ti faire ti réaliser. Le St Prophète(s.a.w) fine demande à banne Mecquois qui zotte penser lors so traitements envers zotte, et alors zotte fine supplier li pour pardonne zotte et libère zotte. Zotte ti banne prisonniers de guerre et le Prophète(s.a.w) fine réponde zotte en pleurant, qui zotte pas pou gagne aucun reproche excepté 12 dimounes et parmi zotte ti éna Ikrama. Ikrama so madame fine demande so pardon et le St Prophète(s.a.w) fine accorde li le pardon. Madame-là fine ramène Ikrima de Yemen, côte li ti sauvé. Et Ikrama fine réaliser qui si ène dimoune capave pardonne à so pire ennemis li besoin ène dimoune véridique et li fine converti à l'Islam. Habbar aussi ti mérite la peine de mort parce qui li ti coupe la corde de chameau de Zainab(r.a), fille du Prophète, et fine faire li tomber. Suite à ça accident-là Zainab(r.a) ti faire ène fauche couche et ti fine trouve la mort. Habbar fine accepter l'Islam et Hazrat Muhammad fine pardonne li. Seulement quatre criminels ti puni par la peine de mort. Banne Méдиноis ti gagne tracas attention qui le St Prophète(s.a.w) retourne vivre dans so la ville natal, c'est-à-dire Mecca. Mais le St Prophète(s.a.w) pas fine oublier coumma zotte fine aide li pendant les années difficile qui l'Islam fine traverser. Le St Prophète(s.a.w) fine rassure zotte et fine dire qui li pou vivre côte zotte pé vivre et pou mort côte zotte pou mort.

17. Bataille de Hounaine

Ène menace militaire ti plane lors la ville depuis le sud. Quand tribu Hawazins et tribu Thaquif fine apprend qui banne mecquois fine soumette zotte, 20 mille hommes fine rassembler et fine alle faire la guerre contre banne musulmans, sous commandements de ène grand guerrier Malik. Pou qui zotte pas sauver, zotte fine amène zotte madames, enfants, et troupeaux. Quand le St. Prophète(s.a.w) fine au courant de ça, li fine emprunte 100 cottes de maille(armure) à Safwan qui pas ti encore embrasse l'Islam, trois mille lances à Nawfal bin Harith, et environ trente mille dirhams à Abdullah bin Rabia et le Prophète(s.a.w) fine sorti pou laguerre avec dix mille hommes, et après dix mille nouveaux mecquois converti ti joindre ça l'armée-là. La bataille ti éna lieu dans la vallée de Hounaine derrière montagne Arafat. Quand banne musulmans fine rentre de ène défilé, zotte fine trouve banne ennemis et zotte la tentes de l'autre côté banne gorges. Quand zotte fine arrive au milieu du défilé, banne ennemis fine commence attaque zotte des deux côtés de la falaise avec banne flèches. Zotte fine tombe dans ène embuscade(attaque surprise) et les dix mille nouveau convertis qui pas ti habitué à banne situations difficiles, fine sauver et ainsi fine créer ène grand désordre. Hazrat Muhammad(s.a.w) fine garde so calme et fine continuer avancer lors so cheval blanc et li ti pé dire : « Mo ène vrai Prophète et mo le fils de Abdul Motallib. » Le Prophète(s.a.w) fine donne l'ordre à Abbas pou crier bien fort et rappelle banne musulmans qui zotte ti promette li qui zotte pou fidèle quand zotte ti en bas l'arbre de Houdaibiya. Et rappelle zotte aussi ça qui zotte fine apprend dans surah Al-Baqara et dire zotte qui le St Prophète(s.a.w) pé appelle zotte. La voix de Abbas fine résonne bien fort et zotte fine saisi par message du Prophète(s.a.w). Beaucoup parmi zotte fine descende de zotte monture, fine attrappe zotte l'épée et fine galoper pour reprend le combat. Banne musulmans fine faire ène attaque coumma la foudre jusqu'à centre de l'armée de banne ennemis qui fine sauver.

Banne croyants ti amène ène butin bien riche et le St Prophète(s.a.w) fine régler so dettes et en plus li fine donne banne cadeaux à banne avec

qui li ti prend prêter. Banne-là fine bien toucher par haute moralité du St Prophète(s.a.w). Safwan fine accepter l'islam, li qui ti pé penser que le Prophète(s.a.w) fine prend so banne armures de force. Après bataille, Hazrat Muhammad(s.a.w) fine retourne à Médina.

18. L'expédition de Tabouk

Ène opposant du St Prophète(s.a.w), Abou Amir, qui ti associé avec banne juifs et banne chrétiens, ti gagne le surnom de l'ermite. Quand le Prophète(s.a.w) fine vine à Médina, Abu Amir fine quitter et fine alle reste à Mecca. Quand Mecca fine vine sous l'influence de l'islam li fine alle à Quba tout près de Médina et là-bas Abou Amir ti change so nom et so façon habiller. Et avec certain ennemis qui ti à Médina li fine faire ène complot contre banne musulmans. Li fine alle en Syrie et fine incite banne chefs chrétien Arabe pou vine attaque Médine. En même temps banne hypocrites ti répanne ène fausse nouvelle qui banne byzantins ti rassembler ène grand l'armée pou attaque Arabie. Et par ça deux complots-là Abu Amir ti penser qui banne musulmans pou alle la guerre contre banne chrétiens Syriens et l'islam pou fini. Rumeurs qui ennemis pou vine attaque Médine ti tellement répandre que le Prophète(s.a.w) li même ti pense pou alle dirige l'armée. Mais li pas ti ène bon moment car ti éna ène grand famine et ti pé faire bien chaud. Banne troupeaux ti pé diminuer et récolte ti bien pauvre. Manger ti pé vine bien rare et banne hypocrites ti pé décourage banne combattants. Banne croyants ti prêt pour laguerre mais zotte pas ti éna armes et manger. Uthman(r.a) ti faire dons de nourriture et armes pou dix mille combattants. Abu Bakr(r.a) ti donne tout so fortune au St Prophète(s.a.w). Banne musulmans pauvres ti gagne montures, l'épées et lances pou alle combattre. Et parmi zotte certain pas ti alle la guerre parce qui pas ti éna nourriture pou zotte. Zotte ti éna larmes dans zotte li yeux. Et ène verset Coran dire : "Pas éna blâme pou banne qui ti vine demande monture et qui ou fine répondre ou pas ti éna et zotte fine retourner avec larmes aux yeux, avec chagrin car zotte pas ti éna aucun ressources."

Banne madames ti pé encourage zotte mari pou alle la guerre : ène

madame fine faire so mari joindre l'armée après qui li fine retourne de ène voyage. Avec beaucoup de difficulté l'armée musulmane ti pé avancer. Zotte ti pé soif et par doah du St Prophète(s.a.w), la pluie fine tomber. Le Prophète(s.a.w) fine faire même banne la sources qui ti sec, recommence couler. Enfin zotte fine arrive à 400 km de Médine à Tabouk, près côte bordure de l'empire byzantin. Le Prophète(s.a.w) ti envoye banne hommes dans plusieurs direction pou gagne renseignement mais pas ti éna aucune armée qui ti en préparation de guerre. Hazrat Muhammad(s.a.w) ti reste lors frontière quelques jours pour faire banne accords avec plusieurs tribus et pas fine éna aucun bataille. Expédition ti dure deux mois et demi. Quand Hazrat Muhammad(s.a.w) fine retourne à Médine li fine accepter banne excuses banal de banne dimoune qui pas ti alle laguerre. Puis après le St Prophète(s.a.w) fine démolir ène Masjid à Quba, qui banne hypocrites ti bâtir pour faire zotte banne complots contre l'islam. Alors zotte fine obliger faire zotte namaz ensemble avec banne les autres musulmans. Quand Hazrat Muhammad(s.a.w) fine retourne de Tabouk, li ti bien content qui banne habitant de Taif fine accepter l'islam. Et après les autres tribus arabes ti faire ène demande pou joindre banne musulmans et après peu de temps toute l'Arabie ti réuni sous l'islam.

19. Pèlerinage d'adieu

Dans le mois Dhoul Hijja en l'an 10 de l'Hégire, le St Prophète(s.a.w) ti prend direction Mecca avec banne pèlerins. A l'occasion de Hadj ça verset-là ti révéler : « Aujourd'hui, Mo finne ranne zotte religion parfait pou zotte, et Mo finne complète lor zotte Mo grâce, et Mo finne choisir pou zotte l'islam comme religion. »(5 :4)

Le St Prophète(s.a.w) fine récite ça verset-là dans la vallée de Mouzedalifa côte banne pèlerins ti rassembler en grand nombre. Le 11 Dhoul Hijja à Mina li ti faire ène sermon connu comme le Sermon d'Adieu.

« O banne hommes, écoute-moi bien car mo pas conner si mo pou revinne dans ça vallée pou adresse zotte encore coumma mo pé faire maintenant. (...)

O banne hommes ou éna droit lors ou banne épouses tout comme zotte éna droit lors ou. Et ou en droit pou exiger qui zotte reste chaste et pas faire narien qui pou déshonore zotte mari devant so peuple. Si zotte commettre ène tel action alors puni zotte mais punition-là pas besoin trop sévère et en retour ou besoin donne zotte nourriture, vêtement et abris selon ou mode de vie. Et traite ou épouse bien car Allah fine mette ou comme ène mandataire. Selon la loi de Dieu ou fine prend zotte sous ou toit et ou pas bisin insulter celle qui Allah fine mette sous ou responsabilité et fine confier à ou... »

Le St Prophète(s.a.w) fine conseille banne qui encore éna prisonnier pou traite zotte pareil coumma zotte-même, donne zotte manger et habille zotte pareil coumma ou. Le St Prophète(s.a.w) fine aussi dire qui tous humains égal devant Allah sans aucun distinction de classe social ou de race. Aucun Arabe pas supérieur à ène l'autre humain non-Arabe, excepté de par so piété. Ensuite le St Prophète(s.a.w) fine demande zotte : « Est-ce qui zotte conner dans qui mois zotte été, dans qui territoire zotte été, qui jour zotte été? » Et banne musulmans fine réponde qui zotte conné qui li le mois sacré et le jour du pèlerinage. Alors le St Prophète(s.a.w) fine dire zotte : « O peuple, la vérité c'est qui Allah fine rende sacré ou personne, ou du bien et ou l'honneur jusqu'a jour qui ou pou vine devant Li en So présence, pareil coumma ça mois-là li sacré, ça territoire-là sacré et ça jour-là sacré. » Ça sermon-là montrer nous comment le St Prophète(s.a.w) ti éna tracas pou enseigne l'égalité entre banne hommes, le bien être de la femme et pou rendre à banne faible zotte droit et installe la paix dans le monde. Li bon noter qui l'Islam fine accorde à banne madames le droit pou possède et gère zotte du bien et aussi le droit à l'héritage. Et c'est à peu près 13 siècles après qui banne nations européen fine accorde ça banne droits-là à banne madames. Et après qui cérémonie Hajj fine terminer le St Prophète(s.a.w) fine retourne à Medina.

20. Le dernier jour du St Prophète(s.a.w)

Après qui le St Prophète(s.a.w) fine retourne à Medina li fine consacrer tous so le temps à instruire so banne fidèles, et enseigne zotte banne

niveau morales très haute et reforme zotte et faire zotte gagne bon manières. Le St Prophète(s.a.w) ti au courant qui so la mort ti près et dans so banne discours li ti pé faire allusion à so la mort prochaine.

Ene jour le St Prophète(s.a.w) fine dire à so banne compagnons qui li fine gagne ça révélation-là :

« Quand l'aide Allah et victoire-là pou arrivé, et ki to trouve banne dimounes pé rentre par troupes dans la religion d'Allah, alors, avec louange to Seigneur, célébré So Sainteté, et implore So pardon. En vérité, Li Fort lor accepté repentance. »

A ça l'occasion-là le St Prophète(s.a.w) fine explique à so compagnons qui Allah fine donne à So serviteur le choix entre le monde et So rencontre immédiate avec Allah et So serviteur fine choisir rencontre avec Allah. Hazrat Abou Bakr(r.a) fine comprend, avant tout dimounes, qui la mort du Prophète(s.a.w) pé approcher et li fine commence pleurer. Le St Prophète(s.a.w) ti fini accompli so travail. Tout comme ène bon jardinier, li fine bien labore so terrain et li fine donne à banne la grain ène bon la terre. Quand moment pou récolter fine approcher li fine préfère alle joindre so Maitre et laisse les autres récolter.

Hazrat Muhammad(s.a.w) fine tombe malade et fine dirige la prière pendant encore quelques jours et après li ti vine trop faible pou continuer. Ène jour quand li ti pé faire ène discours, li fine dire à banne fidèles qui li ti pou apprécier qui si li ti faire quelqu'un du tort, la personne vine réclame so réparation, car vaut mieux répare ou tort dans ça le monde-là qui côte Allah. Tous banne compagnons commence pleurer car zotte fine senti qui zotte qui doit beaucoup à Hazrat Muhammad(s.a.w) car li fine endure beaucoup de souffrances à cause zotte. Mais Okacha fine lever et fine demande Hazrat Muhammad(s.a.w) réparation car li ti enfonce so coude dans le dos de Okacha pendant la bataille d'Ohoude. Lorsque le St Prophète(s.a.w) fine présente so le dos, Okacha fine faire la remarque qui quand li ti gagne ça coup-là so le dos ti nu. Le Prophète(s.a.w) alors fine lève so chemise et Okacha tout en pleurant fine presse so figure lors la poitrine du Prophète(s.a.w) pou dire li adieu

de so facon.

Quand so malade fine aggraver, banne madames du Prophète fine donne li permission pou reste dans la chambre d'Ayesha(r.a). Ène Lundi en 632, le St Prophète(s.a.w) fine mort. Ça jour-là le St Prophète(s.a.w) pas ti pé capave assisé, et Ayesha(r.a) ti assise derrière li et tenir so la tête lors so poitrine. Li ti vine de plus en plus faible et li fine dire malheur à banne juifs et à banne chrétiens qui fine encourage pou adore tombes de zotte banne Prophètes. Et Ayesha(r.a) fine senti qui la tête du Prophète(s.a.w) fine vine bien lourd et tout en prononçant : “Vers mon Ami, le plus Exalté, vers mon Ami le plus Exalté”, le St Prophète s.a.w fine rende so dernier soupir. Banne fidèles fine saisi quand zotte fine tendé qui le Prophète fine mort. Umar(r.a) pas ti pé rode croire et li fine retire so l'épée et ti menace pou tranche le cou de celui qui pou ose dire que le St Prophète(s.a.w) fine mort. Quand li fine tende la triste nouvelle, Abu Bakr(r.a) fine arrive à tout vitesse . Li fine traverse masjid et fine rentre dans la chambre d'Ayesha(r.a). Li fine alle vers le corps du St Prophète(s.a.w) et li fine découvert so figure, li fine embrasse so front. Larmes d'amour et de chagrin ti pé coule lors so la joues. Abu Bakr(r.a) fine dire : « Allah nous Temoin, la mort pas pou surprendre nous deux fois. » Li fine regagne la mosquée et récite ça verset Coran-là devant banne fidèles qui fine rassembler : « Et Muhammad li seulement ène Messager, tous banne Messagers avant li fine mort. Si li trouve la mort et si quelqu'un tué li, est-ce qui ou pou faire marche arrière. » Banne qui parmi zotte adore Allah, conner qui Allah Li vivant et Li pas pou mort, mais banne qui adore Muhammad(s.a.w), mo pé assure zotte qui Muhammad fine mort.

Si ti éna ène seul messenger qui ti vini avant qui ti échappe à la mort, banne musulmans ti pou éna raison pou réclame en pleurant le retour du Prophète(s.a.w). Mais tous ça qui ti vine avant li fine mort. Et ça discours-là fine reconforte le coeur banne fidèles et Umar(r.a) à ce moment-là fine réaliser qui fine arriver et fine tomber car li fine senti qui so la jambe pas pé capave tenir li. Le poète Hassan bin Thabit fine exprime douleur profond de banne croyants à travers so banne célèbre vers :

« Tu étais la pupille de mes yeux. Maintenant que tu es mort, mes

yeux sont devenus aveugles. Peu m'importe qui meurt. Car je ne craignais que ta mort. »

HAZRAT AHMAD^(a.s) LE MESSIE PROMIS

1. SO NAISSANCE ET SO L'ENFANCE

Le 13 février 1835, deux jumeaux, ène ti fille et ène garçon, fine prend naissance dans la case de Mirza Ghulam Murtaza et Chiragh Bibi. Ti fille-là ti appelle Jannat, mais malheureusement à la naissance même li ti mort. Garçon-là ti appelle Ghulam Hazrat Ahmad^(a.s). Banne parents-là ti bien content quand Hazrat Ahmad^(a.s) ti né, mais zotte pas ti rende zotte compte qui ça zenfant-là pas ti ène zenfant ordinaire.

Quand Hazrat Ahmad^(a.s) ti petit so l'enfance ti passe tranquillement. Li ti conne monte cheval et li ti conne nager et gallope bien vite mais li pas ti intéressé dans sports et bien rarement li ti pé prend part dans banne jeux. Pendant so jeunesse li ti appranne banne langues classiques et étudier l' Islam. So létemps ti pé passé à lire banne livres lors Islam ou bien li ti pé reste dans Masjid. So papa ti faire ène joke qui, si ène jour nous pas trouve Hazrat Ahmad^(a.s), nous besoin alle rode li dans banne nattes enroulé dans Masjid. So l'adolescence ti marqué par ène dévotion intense envers Allah.

2. HAZRAT AHMAD^(a.s) A SIALKOT

Banne ancêtres de Hazrat Ahmad^(a.s) ti èna beaucoup terrain mais zotte ti perdi la plupart là-dans et Mirza Ghulam Murtaza ti èna l'espoir qui so garçon ti pou aide li pou régagne ça banne terrains-là. Mais Hazrat Ahmad^(a.s) pas ti intéressé par banne du bien de ça lémonde-là.

Petit à petit zotte situation financière fine détérioré et Mirza Ghulam Murtaza fine conseille so garçon pou commence ène travail. Quand li ti èna 29 ans, Hazrat Ahmad^(a.s) fine gagne ène poste dans la cour de Sialkot, ène vieux cité bien connu au bord de ène vallée de Cashmire.

Là-bas le Christianisme ki fine arrive depuis l'Europe, ti pé progressé bien vite. Sûrement Allah ti oulé ki le futur Messie reste quelque temps dans ène environnement cotte èna banne activité chrétiens. Même à Sialkot Hazrat Ahmad^(a.s) ti pé passe tout so létemps libre dans la prière. Parfois li ti joine

banne prêtres et ti pé cause lors le Christianisme et li ti révèle zotte la fausseté de zotte croyances. So banne paroles ti pieuse et so banne manière ti simples et li fine gagne banne bon camarades chrétien. Le Révérend Butler ti èna ène grand respect pour li et souvent li ti pé vine cause avec li comme ène camarade.

3. BANNE CHRETIENS ET BANNE HINDOUS ATTAQUE L'ISLAM

Tous les jours ti èna banne musulmans ki ti pé converti en Chrétiens et banne chefs musulmans ti pé tracassé. Quand zotte fine gagne succès, banne prêtres chrétiens fine continué attaque le St Prophète^(s.a.w) et l' Islam et banne intellectuels musulman pas ti capave défende zotte parce qui zotte pas ti conne la beauté de l' Islam. Malheureusement, zotte ti pé réagir dans banne façons bête et zotte ti incapable pour montré vrai beauté de l' Islam.

L'Arya Samaj, qui ène nouveau groupe hindou, fine aussi attaque l' Islam et so Prophète^(s.a.w). Banne musulmans ti faibles et zotte pas ti pé capave réponde ou bien zotte ti pé converti en grand nombre. L'heure ti arrivé pou qui Allah envoye ène dimoune pou défende l' Islam et ça dimoune-là ti le Messie Promis Hazrat Ahmad^(a.s).

4. HAZRAT AHMAD^(a.s) DÉFENDE L'ISLAM

Hazrat Ahmad^(a.s) ti bien chagrin de ça l'état terrible côte banne musulmans ti arrivé-là. Alors li ti considère qui so premier devoir c'était pou défende l' Islam et li fine écrire beaucoup l'articles dans banne journals contre l'attaque de so banne adversaires. En 1864, Hazrat Ahmad^(a.s) ti gagne ène vision extraordinaire côte li fine trouve li en compagnie de Hazrat Mohammad^(s.a.w). Li trouve Hazrat Mohammad^(s.a.w) pé attrappe ène livre qui li ti pé écrire, et coumma li attrape li, ça livre-là changé en ène fruit bien juteux et quand fine coupe ça fruit-là pour partage li, du miel ti pé coulé. Donc ça vision-là montré qui Hazrat Ahmad^(a.s) ti pou écrire banne livres qui pour contenir banne merveilles de l' Islam et pou profite

beaucoup dimounes.

En 1880, tous banne musulmans ti extra content quand ça rêve-là fine accompli. Quand Hazrat Ahmad^(a.s) fine écrire so livre ki bien renommée, Braheen-é-Ahmadiyya ki fine établi définitivement la supériorité de l'islam lor tous religions. Li fine montré l'excellence du St Quran et la véracité du St Prophète^(s.a.w) et les enseignements parfait de l'islam dans ça livre-là. Hazrat Ahmad^(a.s) ti même offert ène récompense à celui ki ti pou capave oppose ça banne arguments-là. Ça travail unique lor l'islam et ça défi imbattable-là fine faire banne musulmans bien content et zotte ti pé considère Hazrat Ahmad^(a.s) comme le réformateur de l'époque. Mohammad Hussein, ène grand chef musulman de Batala, fine félicite Hazrat Ahmad^(a.s) pour so efforts magnifique et li fine faire ène commentaire lor ça livre-là. Beaucoup banne grand intellectuels de l'islam fine faire banne excellent commentaire et zotte fine rende hommage à Hazrat Ahmad^(a.s) pour so discours remarquable lor l'islam.

5. LA MORT DE SO PAPA

En 1876, Hazrat Ahmad^(a.s) ti à Lahore quand li fine rêvé ki la fin de so papa ti pé approché bien vite. Li fine retourne Qadian bien vite et li fine trouvé ki so papa fine gagne dysenterie. Lendemain matin, Hazrat Ahmad^(a.s) fine gagne révélation ki so papa pou mort après coucher du soleil. Ça pensée ki bientôt li pou perdi so papa ti pé fatigue li. En même temps li ti pé pensé qui après la mort de so papa, so famille aussi pour gagne difficulté pour vivre.

A ce moment-là, li fine gagne révélation :

أَلَيْسَ اللَّهُ بِكَافٍ عَبْدَهُ

Alaysallaahou bikaafine 'abdahou

« EST-CE QUI ALLAH PAS SUFFISANT POU SO

SERVITEUR? »

Ça banne mots-là fine rassure li ki Allah pou vine à so secours et ki faudré pas ki li prend tracas. En effet, Ghulam Murtaza fine mort ça jour-là après coucher du soleil pareil coumma révélation ki so garçon ti gagné.

6. SO MARIAGE

A l'âge de 16 ans, Hazrat Ahmad^(a.s) ti marié avec so cousine Hurmat Bibi, ti fille de Mirza Jamiat Beg. De ça mariage-là, li fine gagne 2 garçons qui ti appelle Mirza Fazl Ahmad et Mirza Sultan Ahmad. Malheureusement so madame ti tellement attaché avec so parents ki li fine alle avec banne qui contre so mari. Beaucoup fois, Hazrat Ahmad^(a.s) fine conseille li et fine mette li en garde contre banne mauvaise fréquentation mais ça pas fine change narien. Alors, Hazrat Ahmad^(a.s) fine séparé avec so madame.

Plus tard le 17 novembre 1884, sous l'ordre Allah, Hazrat Ahmad^(a.s) ti marié ène deuxième fois avec Hazrat Nusrat Jehan Begum^(r.a), ti fille de Mir Nasir Nawaab qi ti appartenir à ène famille noble de Delhi. Par la grâce d'Allah zotte mariage ti réussi et fine duré jusqu'à la fin. Zotte fine gagne plusieurs zenfants. Parmi ti éna:

1. Mirza Bashir Ahmad(1887-1888)
2. Shahibzada Mirza Bashiruddin Mahmoud Ahmad^(r.a), le deuxième Calife(1889-1965)
3. Shahibzada Mirza Bashir Ahmad Qamar-ul-Ambiyyâ (1893-1963)
4. Shahibzada Mirza Sharif Ahmad(1895-1961)
5. Sayyeda Nawaab Mobaréka Begum(née en 1897)
6. Sayyeda Nawaab Amtoul Hafiz Begum(née en 1904)

7. VOYAGE A HOSHIARPOUR.

En janvier 1886, après ki Hazrat Ahmad^(a.s) fine gagne ène révélation divine,

li fine alle à Hoshiarpour, ène ti ville près côte la rivière Bias. Trois de so banne partisans fine accompagne li. Pendant ki li ti pé traverse la rivière dans ène vieux bateau, Hazrat Ahmad^(a.s) fine remarqué ki la compagnie de ène dimoune sainte, li pareil coumma quand pé traverse ène la rivière : soit ou réussi arrive l'autre coté la rivière sain et sauf ou soit ou noyé et ou perdi spirituellement pou tous les temps. Sa remarque prophétique-là fine accompli car Fateh Khan, ène parmi ça trois compagnons-là fine quitte Hazrat Ahmad^(a.s) plus tard et spirituellement li fine noyé.

Quand li fine arrive à Hoshiarpour, Hazrat Ahmad^(a.s) fine alle dans ène place tout seul pendant 40 jours côte li fine garde roza et faire banne la prières spécial. Li fine gagne ça révélation-là : « Béni soit celui qui là et béni à banne qui dans les alentours ». Hazrat Ahmad^(a.s) fine expliqué qui premier partie de ça révélation-là pé réfère à li-même et deuxième partie pé réfère à so banne fidèle compagnons ki ti présent dans ce moment-là. Ène fait ki ti assez surprenant, c'est qui juste Fateh Khan de ça trois-là ki ti absent. Pendant ki li ti pé reste à Hoshiarpour, ti éna ène discussion entre Hazrat Ahmad^(a.s) et Murlidhar, ène représentant local du groupe Arya Samaj. Murlidhar fine commence éna banne arguments inutile et li fine commence cause en dehors sujet ki ti pé discuté-là. A la fin, li fine quitte réunion-là et li fine accepté ki li pas à la hauteur pou li continué ça discussion-là. Vers la fin septembre 1886, Hazrat Ahmad^(a.s) fine faire publié ène l'autre livre important « Surma Chashma Arya ». Ça livre-là cause lor banne miracles et zotte nature et zotte fonction. Dernier, Hazrat Ahmad^(a.s) fine invite tous banne Arya Samajist pour vine discuté en public et compare l'enseignements Védas et Quran. Pas ti éna personne pou relève ça défi-là.

8. FATEH MASSIH FAIRE ÈNE FAUSSE REVENDICATION

Fateh Massih ti ène missionnaire chrétien ki ti revendiqué ki li fine communié avec Dieu et ki so la prière ti exaucé. Li ti pé dire ça dans ène façon vantard

ki li pou faire banne prédictions et li fine demande ène meeting public côte li-même et Hazrat Ahmad^(a.s) pou annonce zotte prophéties. Mais dans l'assemblée-là, Fateh Massih pas fine mentionne aucun prophétie mais li ti pé évite ça topic-là. Zotte fine attire so l'attention lor topic de so réunion plusieurs fois et li fine avoué sans aucun la honte ki li pas ti pé gagne révélation. Le public fine reproche li ki fine faire ène fausse revendication et ki li fine faire zotte perdi ène le temps précieux. Toute fois Hazrat Ahmad^(a.s) fine invite tous banne chrétiens du monde pou prouvé ki zotte capave communié avec Dieu de la même façon ki li.

9. NAISSANCE DE ÈNE GARÇON KI POU BIEN CONNU

Hazrat Ahmad^(a.s) ti annonce ène prophétie à propos ène garçon célèbre et souvent li ti pé gagne banne signes depuis Allah lor ça sujet-là. Le 12 janvier 1889, ça prophétie-là fine accompli et Bashir-Ud-Din Mahmoud Hazrat Ahmad^(a.s) fine né. Beaucoup banne révélations ki Hazrat Ahmad^(a.s) ti pé gagné ti pé signifié ki ça garçon-là pou vine le réformateur promis et so nom pou reconnaître dans le monde entier. Li facile pou trouvé ki ça banne révélations-là fine bien réalisé dans la personne de Hazrat Mirza Bashiruddin Mahmoud Ahmad^(ta), deuxième Calife du Mouvement Ahmadiyyat de l'Islam. C'est grâce à so dévouement continuel, so banne efforts extraordinaire et so grand l'énergie qui nous communauté fine faire progrès. Pendant 50 ans, li fine faire pas moins de six mille sermons et banne longues causeries lors l'Islam et l'Ahmadiyyat. Li ti éna ène grand connaissance de l'Islam et de la philosophie du St Coran et Allah ti donne li aussi ène grand talent d'orateur. So façon pou organiser la communauté ti ène preuve pour montré ça. So l'amour et l'enthousiasme pou l'Islam fine aide li pou construire banne mosquées dans beaucoup pays côte banne missionnaires pé répande la beauté de l'Islam et côte zotte guide banne nouveaux convertis. So banne travail littéraires, surtout banne livres lor traduction et l'interprétation du St Coran (Tafsir-e-Kabir et Tafsir-e-Saghir) pour reste toujours dans les annales de l'Islam, et zotte banne chef-d'œuvres lor recherches islamiques et la beauté spirituelle. Ça même ti travail du Réformateur promis et du Fils promis de

Hazrat Ahmad^(a.s).

Malgré ki Allah fine appelle Hazrat Ahmad^(a.s) comme le réformateur et Prophète du siècle depuis 1883, li ti pé hésité pour prend ba'iat (serment de fidélité et d'obéissance spirituelle) de so banne membres. Après ki Allah fine ordonne li en mars 1888, li fine invite tous dimounes à Ludhiana pour réunir zotte tous sous ène lien spirituel par le ba'iat. Beaucoup suivants ti vini pour ça alliance sainte-là.

Hazrat Ahmad^(a.s) ti continié corrige banne mauvais interprétation de banne enseignements islamique. Li ti toujours prêt pour défende banne attaque de banne chrétiens et banne hindous. Li bon pour conné ki dans en l'espace de 7 ans, li fine réponde à pas moins de 90 000 lettres tout seul et fine joine et discute avec environ 60 000 dimounes sans compte banne préparation de banne pamphlets, livres, conférence publique et banne travail de tous les jours. Juste secours Allah ki fine aide li pour servi Islam.

10. LA DEUXIÈME VENUE DE JESUS

En 1891, Hazrat Ahmad^(a.s) fine publié 3 livres : Fateh Islam, Tauzih Maram et Izala Auham. Ça ti banne livres ki éna grand valeur. Li fine revendiqué ki li-même le Messie Promis et Mehdi de l'époque. Et li expliqué ki banne prophéties à propos deuxième venue du Christ besoin pas prend zotte dans ène façon littéral. Li fine écrire ki Jésus^(a.s) pas pou vine en personne depuis le ciel. Si ça ti possible, Élie^(a.s) aussi ti pou descende avec so lécorps physique depuis le ciel d'après banne écritures sainte. Li fine remarqué ki l'interprétation de Jésus^(a.s) ti tout à fait définitive lor ça point-là car li fine dire :

« Car tous banne Prophètes et la loi prophétisé jusqu'à Jean ; et si zotte oulé comprend li-même li Élie ki ti pou vini. » (Matt 11 : 13, 14). Après banne disciples fine pose li ça la question: « Ki faire banne écritures fine dire ki Élie pou vini en premier ? ». Li réponde : « Li vrai ki Élie besoin vini pour rétablir tous banne quittechoses. Mais si mo dire zotte ki Élie fine déjà vini et ki zotte pas fine reconnaître li et ki zotte fine traite li coumma zotte oulé. Pareil, le fils de l'homme pou souffert pou zotte. » Alors banne disciples fine

comprend ki li pé cause à propos de Jean-Baptiste ». (Matt. 17 : 10-13). Quand li ti pé cause lors so propre venue, Jésus^(a.s) fine dire à so banne disciples :

« Aster zotte pas pou trouve moi jusqu'à ki zotte pou dire: « Béni pou ça dimoune ki pou vine au nom du Seigneur ! » (Matt. 23 :39)

Ça montré clairement ki Jésus^(a.s) pas pou vini en personne mais ène l'autre dimoune pou vine en so nom.

11. REVENDICATION KI LI-MÊME LE MEHDI

Depuis beaucoup l'années, banne musulmans ti pé attend la venue du Mehdi et tous banne ancien prophétie montré sans faute ki li-même ki ça dimoune ki zotte pé attend depuis longtemps. Quand Hazrat Ahmad^(a.s) fine proclamé ki li-même le Messie Promis et le Mehdi, ça fine faire l'opposition réagir depuis partout côtés. Banne livres violent, banne pamphlets moqueur et banne adversaires fou ti rejette l'annonce ki Hazrat Ahmad^(a.s) fine faire. Muhammad Hussein de Batala, qui avant ti prêt pou reconnaître Hazrat Ahmad^(a.s) comme le Champion invincible de l'Islam, maintenant oulé humilié et insulté Hazrat Ahmad^(a.s). Banne propres connaissances de Hazrat Ahmad^(a.s) fine joine banne adversaires de Hazrat Ahmad^(a.s), c'est-à-dire banne chrétiens, banne Arya Samajiste et banne musulmans jaloux, pour ki zotte déshonore li. Alors Hazrat Ahmad^(a.s) fine défié zotte pou faire ène discussion en public et pou amène banne arguments contre ça revendication-là.

12. ENE VISION A PROPOS ENE MISSION A LONDRES

Dans so livre Izala Auham, Hazrat Ahmad^(a.s) fine cause lor ène vision ki li fine gagné, côte li fine trouve li pé lire ène sermon à Londres lor la véracité de la foi islamique. Après li ti attrappe beaucoup oiseaux blancs ki ressemblé banne perdreaux qui ti lor banne petit arbres. Hazrat Ahmad^(a.s) fine comprend ki ça oulé dire qui ça ki li fine écrire pou traduire en anglais et coumma ça la plupart banne dimounes ki justes parmi banne anglais pou accepté la vérité.

A propos de ça, li bon ki rappelle ki le second successeur de Hazrat

Ahmad^(a.s), Hazrat Mirza Bashir-Ud-Din Mahmood Ahmad^(r.a), ti invité pou prend part à ène Conférence Religieuse Mondiale pour ki li faire ène conférence lor Islam. Dans ça l'occasion-là même, li fine fine pose la première pierre de la mosquée à Londres. A partir ça jour-là, banne missionnaires Hazrat Ahmad^(a.s)i fine commence répandre Islam à banne anglais depuis la mosquée de Londres et par la Grâce d'Allah, beaucoup fine converti en Ahmadi.

13. LE SCRIBE DE DELHI

Vers la fin 1891, Nazeer Hussein, ène musulman depuis Delhi, fine demande ène discussion en public avec Hazrat Ahmad^(a.s). Le 20 octobre, banne arrangements fine faire pour ça causerie-là dans la mosquée principale. Ene la foule de cinq mille dimounes, excité contre Hazrat Ahmad^(a.s), ti pé attend avec bâtons, roches et couteaux pou attaque Hazrat Ahmad^(a.s) et so banne partisans. Lor plateforme, le méchant Mullah fine faire par exprès quand li fine pose banne questions ki pas besoin. Avant terminé, coumma Nazeer Hussein ti planifier, banne dimounes dans la foule fine commence envoye roche lor Hazrat Ahmad^(a.s) et so groupe. Heureusement qui la police fine vini à temps, ça fine créé ène panique et zotte fine sauvé.

14. PREMIER JALSA SALANA

Le 27 décembre 1891, Hazrat Ahmad^(a.s) fine organise premier Jalsa à Qadian pour banne membres de so communauté dans le but pour faire zotte la foi vine plus ferme et aussi pou donne banne participants-là l'occasion pour augmente zotte connaissance de la religion. Environ 80 membres fine prend part dans ça premier conférence-là. Quand Hazrat Ahmad^(a.s) fine trouve succès de ça conference-là, li fine décidé pou faire ça programme-là tous les l'année. Ça ti ène fait extraordinaire pou constaté ki la quantité dimounes ki participe dans ça conference-là ti pé extra augmenté. Quantité dimounes ki ti assisté ti fini dépasse 100 000

dans conférence ki ti éna en 1963. Aujourd'hui banne participants vine depuis banne pays bien loin, coumma l'Europe, l'Amérique, l'Afrique et l'Extrême Orient. Présence de banne chercheurs de la vérité, ki ti vine depuis banne pays bien loin, li ène preuve sûre de la prophétie ki Hazrat Ahmad^(a.s) fine faire : « Banne dimounes pou vine vers toi depuis tous coins du monde. »

15. LA FIN DE ATHAM

D'après prophétie ki le St Prophète^(s.a.w) fine faire, Hazrat Ahmad^(a.s) pou casse la croix quand li pou proclamé ki Jésus^(a.s) pas fine mort lor la croix. Ça ti donne ène coup au christianisme ki croire dans la mort du fils de Dieu lor la croix et à so résurrection trois jours après. Donc ça déclaration-là fine faire zotte la foi vine lor rébord ène précipice parce qui li détruire tout à fait zotte croyances. D'après Paul, si Jésus pas fine mort lor la croix et ki li pas fine ressuscité, alors zotte la foi li dans vide. Banne Chrétiens fine comprend ça bien vite et zotte fine recommence ène campagne tout de suite. Zotte fine organise ène discussion dans ène façon grandiose. Dr. Henry Martin Clark et so assistant Abdullah Atham ti pé défende la croix. Ça rencontre-là fine dure 15 jours.

Pendant ça débat-là, Hazrat Ahmad^(a.s) fine gagne ène révélation ki Atham (porte parole de banne Chrétiens) pé servi mensonge par exprès, et ki li pé abandonne vrai Bondié, et ki li montré ki Bondié faible et capave mort. Atham pou retrouve li dans ène grand tracas (*haviyah*) pendant 15 mois, chaque mois égal à chaque jour ki ça débat-là fine duré. Lèrla, Hazrat Ahmad^(a.s) fine dire Atham ki Allah pou déshonore li si li tourne so le dos avec la vérité. Pendant ça réunion-là, fine demande banne adversaires chrétien si zotte pou accepté Hazrat Ahmad^(a.s) comme ène vrai Prophète si ça signe-là pou réalisé. Quand Atham fine entende banne paroles de Hazrat Ahmad^(a.s), li fine commence tremblé. Li fine vine pâle si tant li ti pé gagne peur, et beaucoup fois li fine répète ça banne mots-là ; « Mo repenté ! Mo repenté ! Mo pas oulé manque de respect. Jamais mo fine dire ki le St Prophète li le Dadjaal ou ène imposteur. » Ça conférence-là fine abaisse réputation de banne Chrétiens quand Atham fine faire semblant gagne ène malaise et li fine

quitte la scène avant ki fini.

Nous besoin comprend ki ça prophétie concernant Atham ti d'après ène condition. Li ti demande pardon tout de suite pour banne rémarques et pour so l'attitude vis-à-vis le prophète Muhammad^(s.a.w). Après ça li fine reste tranquille lor tous ça banne z'affaires-là et li fine gagne extra peur. Li fine refuse pour répète tous ce ki li fine dire en public et refuse pou continué prêcher. Li fine avoué ki ène serpent pé rode pique li pou li mort. Li fine même dire ki li pé trouve banne l'ombrage banne dimounes étrange ki éna z'armes et ki pé poursuive li la nuit et li jour. Ça même ti ça grand tracas (*haviyah*) ki fine arrive li là.

Ene chance pou li, ça 15 mois-là fine passé. Banne Chrétiens ti bien content parce qui zotte ti croire ki ça prophétie-là ti pé rode dire ki Atham besoin mort ou gagne ène malheur et zotte ti croire ki prophétie-là pas fine accompli. Hazrat Ahmad^(a.s) fine invite Atham pou vine dire ki ça prophétie-là li fausse devant tous dimounes mais Atham ti si tant capon ki li pas fine oulé avoué ça sous serment. Donc li ti pé attire Allah So colère lor li et la mort certaine. Hazrat Ahmad^(a.s) ti même offert li ène récompense si li avoué sous serment ki ça prophétie-là pas fine accompli mais Atham fine encore ène fois refusé pou faire serment ou même pou cause lor-là. Lèrla, Hazrat Ahmad^(a.s) fine faire ça prophétie-là : « Puisque Atham pas pé oulé avoué sous serment ki li ti subir affreux tourment (*haviyah*) ki ti prédire pou li, Bondié pas pou laisse li sans punition parce qui li ti envie décevoir le public et cachiète la vérité. Ça jour-là pas loin pou li et li pé approché bien vite »

Enfin, ça jour-là fine vini et Atham fine mort quelques mois après ça prophétie-là. Tous banne Chrétiens ti abatte par ça et zotte fine plongé dans douleur et désespoir.

16. LE MIRACLE DE L'ÉCRITURE

En 1894, Hazrat Ahmad^(a.s) fine écrire 4 livres en arabes. Li ti défié so banne adversaires arrogant pou faire pareil. Personne pas fine capave écrire même ène mot. Zotte fine reste en admiration devant so style et

so façon d'écrire ki ti parfait. Avant zotte ti pé reproche Hazrat Ahmad^(a.s) ki li pas éna assez connaissance de la langue arabe mais ça banne reproches-là fine retourne contre zotte-même. Hazrat Ahmad^(a.s) dire ki dans ène seul la nuit, Allah fine enseigne li racines de 40 000 mots arabes. Pas éna aucun doute qui so banne livres Karamatus Sadéquine, Hamamatul Bushra, Noor-Ul-Haq et Sirrul Khilafa ti banne preuves sûres de so pensée extraordinaire et de so connaissance de ça langue-là. Ça accomplissement de Hazrat Ahmad^(a.s) ti certainement ène miracle.

17. L'ÉCLIPSE SOLEIL EK LA LUNE

Banne vieux livres cause lor prophétie ki le Prophète Mohammad^(s.a.w) fine faire concernant la venue de ène Mehdi comme suit : « Pou éna 2 signes pou nous Mehdi ki jamais pas ti éna avant pou personne depuis la création le ciel et la terre. Quand li pou vini, pou éna l'éclipse la lune dans banne premier de banne la nuits fixé et ène éclipse soleil vers milieu de banne dates fixé et tous les deux l'éclipses pou éna dans le mois de Ramadhan. » Ti déjà éna l'éclipse avant mais jamais ça banne signes-là ti ène signe ki concerne la venue de ène réformateur d'Allah. Jamais dans l'histoire de banne Prophètes, pas ti éna aucun prophétie ki dire ki ène prophète ou ène réformateur pour vine dans l'époque ki pou éna ène phénomène pareil.

D'après ça prophétie-là, éclipse la lune pou éna lieu le 13^{ème} jour du mois de Ramadhan (c'est à dire, le 21 mars 1894) et éclipse soleil pou éna lieu le 28^{ème} jour du mois de Ramadhan (5 avril 1894). D'habitude gagne l'éclipse la lune dans les environ 13^{ème}, 14^{ème} ou 15^{ème} jour du mois lunaire et d'après ça prophétie-là, ti éna éclipse lors premier de ça banne jours-là, (c'est à dire, 13^{ème} jour) et tandis ki l'éclipse soleil habitué éna li le 27^{ème}, 28^{ème} ou 29^{ème} jour et dans ça cas-là, ti éna l'éclipse-là le 28^{ème} jour ki veux dire, au milieu de ça banne dates fixé-là pareil couma ti prédire. Ça prophétie-là indique la venue du Mahdi et pas ti éna aucun les zautres dimoune à part Hazrat Ahmad^(a.s) ki fine faire revendication qui li réformateur. Donc sa signe-là li applique à so venue.

Hazrat Ahmad^(a.s) fine écrire beaucoup livres contre banne croyances vague de banne Arya Samaj et du Christianisme. En ce ki concerne fondateur de la religion Sikh, Hazrat Ahmad^(a.s) ti gagne ène vision ki Guru Nanak ti ène Musulman ki fine reconnaître Islam comme ène vrai religion. Hazrat Ahmad^(a.s) fine ensuite écrire ène livre (Sat Bachan) lor ça sujet-là, côte li fine annonce banne preuves fermes ki Guru Nanak ti croire dans l' Islam.

18. LA CONFERENCE DES RELIGIONS

Vers la fin de l' année 1896, ti éna ène Conférence des Religions côte ti invite banne représentants de différents religions pour qui zotte vine prend part et participe là-dans. Ti fini décide avant même, qui, pour qui ça conférence-la vine ène succès faudrait pas qui personne attaque croyance de so camarade. Et banne sujets de discussions qui ti choisir pour ça l' occasion-la ti :

- (1). Banne états physique, moral et spirituel de l' homme.
- (2). L' état de l' homme dans l' au-delà.
- (3). Qui but de la vie de ène humain et qui besoin faire pour réussi atteindre ça objectif-la.
- (4). Fonctionnement de banne commandements religieuse qui nous pratiqué dans nous la vie lors la terre et dans nous la vie après la mort.
- (5). Banne sources de connaissances divine.

Pour ça l' occasion-la Hazrat Ahmad^(a.s) ti faire ène grand travail lors ça banne sujets-la. Et quand li ti fini écrire ça banne l' articles, li ti gagne ça révélation-la : « Sa traité-la li même meilleur de tous. » Dans Conférence-la, tellement qui banne dimounes ti intéressé avec so l' article, qui plusieurs orateurs ti dire qui donne lé-temps qui zotte ti gagné pour causé à Hazrat Ahmad^(a.s) pour capave continué écoute so discours. à la fin de ça exposé-la, banne qui ti présent là-bas, la presse, et même banne organisateurs ti d' accord et unanime qui ça même ti meilleur discours qui ti présenté. .

Ti éna aussi plusieurs compliments qui banne dimounes ti faire pour ça

discours-la, comme par exemple : « meilleur et plus admirable présentation de la foi de Mohammad qui nous fine gagne l' occasion trouvé. » et « ène très joli présentation du Saint Quor'an » et aussi « ène causerie bien intéressante, claire, compréhensible et philosophique. » Et Le Journal Spirituel, de Boston ti même appelle li : « De L' Evangile pur » tandis qui le « Bristol Times and Mirror » ti dire qui « li claire qui c' est pas ène dimoune ordinaire qui fine adresse li dans ène tel façon à l' Occident. »

19. LA FIN DE GHULAM DASTAGHIR.

Au commencement de 1897, ti éna ène prêtre musulman qui ti appelle Ghulam Dastaghir et qui ti reste dans ène l' endroit qui appelle Qasur, et ça prêtre-la li, li ti invite banne fanatiques de la Mecque pour qui zotte prend la décision pour excommunier Hazrat Ahmad^(a.s) dans l' Islam (c' est-à-dire qui zotte déclare qui Hazrat Ahmad^(a.s) li pas ène musulman). Et dans ène livre qui ça dimoune-la ti écrire et qui appelle « Fateh Rahmani », ça prêtre-la ti prié Dieu pour détruire Hazrat Ahmad^(a.s) et so banne suivants aussi. Mais, c' est ça prêtre-la même qui ti mort ène mois même après qui li ti faire ça la priere-la, et li pas ti même réussi gagne l' occasion trouve publication de livre qui li ti écrire-la.

20. LA MORT DE LEKH RAM.

Lekh Ram ti ène Arya Samajiste, qui ti bien méchant et ti considéré comme le pire ennemi de l' Islam. En 1897, Hazrat Ahmad^(a.s) ti publié ène révélation côte Allah ti dire li qui, au bout de 6 ans, Lekh Ram pour gagne ène chatiment bien bien sévère parce qui li ti dire banne mauvais mauvais causé à l' égard du St. Prophète de l' Islam. Quand banne ennemis de Hazrat Ahmad^(a.s) ti tende ça prophétie-la, zotte ti dire qui li pas sûr qui ça pour arrivé et qui li ène zaffaire bien vague. A ce moment, Hazrat Ahmad^(a.s) fine réponde qui Lekh Ram libre, et si li croire qui prédiction-la ène simple hypothèse, alors à son tour, li aussi capave faire ène prédiction pareil lor Hazrat Ahmad^(a.s). Hazrat Ahmad^(a.s) ti aussi faire ressortir qui punition de Lekh Ram pas pour

ène quique chose normal, mais qui li pour ène punition étrange, et tellement drôle, qui dimoune pour accepté qui li ène zaffaire surnaturel. En plus de ça, Hazrat Ahmad^(a.s) ti écrire qui li ti gagne ène vision côte ène dimoune qui so figure faire gagne bien peur pé rode Lekh Ram pour puni li. Allah ti même faire mentionne Lekh Ram comme « le veau fondu », et ler-la Hazrat Ahmad^(a.s) ti expliqué, qui c'est dans ça façon-la même qui Lekh Ram pour trouve so la fin tragique.

Li bon qui nous rappelle qui Hazrat Moussa^(a.s) ti brûle le veau dans du feu, après, li ti écrase li et ti fanne so la poussière dans de l'eau ène Samedi après qui Allah ti fini envoie la peste lors le peuple. Lekh Ram aussi pour subir même sort c'est-à dire pour coupe li en morceau, pour brûle li et pour jette li dans de l'eau ; et après ça pour éna ène l'épidémie de la peste qui pour faire ravage.

Hazrat Ahmad^(a.s) ti aussi gagne la révélation qui pour éna ène poignard qui pour servi dans chatiment de Lekh Ram et tous ça-la pour arrivé un jour après la fete Eid.

Mais ça prophétie de Hazrat Ahmad^(a.s)-la pas ti éna aucun l'effet lors Lekh Ram, au contraire, li ti montré li encore plus pire et fine continué abuse le Prophète Mohammad^(s.a.w) dans plus vilain façon encore, et ça fois-la, li fine même prédire qui Hazrat Ahmad^(a.s) pour mort par le choléra après ène période de trois ans, et qui banne descendants de Hazrat Ahmad^(a.s) aussi pour fini complètement.

Finalement, l'heure pour le jugement d'Allah ti arrivé, et Lekh Ram qui ti pé tous le temps demande ène signe à Hazrat Ahmad^(a.s), ti assassiné mystérieusement le Samedi 6 Mars 1897, qui ti lendemain de la fête Eid ; ene dimoune qui ti éna ène figure qui faire gagne peur et qui ti pé reste côte Lekh Ram même, ti donne li ène coup poignard dans so ventre. Tous banne dimounes qui ti tende ça nouvelle-la ti bien choqué, et malgré tous banne recherches qui la police ti faire, jamais pas fine trouve assassin-la. C'est dans ça façon qui le misérable Lekh Ram qui ti pé servi so religion pour attaque banne Prophètes d'Allah ti trouve ène la mort violent.

21. MARTYN CLARK TRaine HAZRAT AHMAD^(a.s) EN COUR.

La fin de Atham ti porte ène coup bien sévère à dignité du Dr. Martyn Clark. Et poussé par la vengeance et la méchanceté, li ti invente ène fausse accusation contre Hazrat Ahmad^(a.s) et pretende qui Hazrat Ahmad^(a.s) ti envoie ène jeune garçon qui appelle Abdul Hamid pour tuer li. En fait, Dr. Clark et les autres dignitaires de l'Eglise fine même montré ça garçon-la pour alle cause menti dans la cour et pour dire qui Hazrat Ahmad^(a.s) ti menace pour tuer le Dr. Clark. Quand le Colonel Douglas, qui ti le Magistrat du District ti prend connaissance de ça plainte-la, li ti fine prend ça cas-la sérieusement, et li fine suivre les procédures et ti faire la police faire ène premier l'enquête. Le Dr. Clark ti déconcerté par décision de magistrat-la et li fine essaye tous so possible pour qui pas faire l'enquête, et li ti dire qui cas-la bien pressé et qui la cause so la santé, li éna l'intention pour alle en Angleterre le plus vite possible. Mais le Colonel pas ti écoute li et ti réfere ça cas-la à la police pour qui capave gagne ène rapport. Abdul Hamid ti fini alle donne même témoignage qui li ti faire dans la cour avec Inspecteur de police, mais, le Surintendant ti ré-appelle li pour gagne ène l'autre témoignage dans so présence. Et pendant qui li ti pé causé, ène coup li fine commence pleuré et fine avoué qui depuis le commencement même, li ti pé cause menti sous instruction de banne dimoune de l'église. Le cas ti termine en place, et du coup fine trouvé qui Hazrat Ahmad^(a.s) innocent ; le Colonel Douglas ti même dire à Hazrat Ahmad^(a.s), qui, si li envie li capave poursuive Abdul Hamid et banne les autres qui ti aide li aussi ; mais Hazrat Ahmad^(a.s) fine réponde qui ça cas contre l'Eglise Chrétienne-la fine déjà enregistré côte Allah. La cause qui so plan pas ti marché, le Dr. Clark ti bien déçu parce qui so l'espoir pour trouve Hazrat Ahmad^(a.s) dans prison fine fini perdu et ensemble avec ça so réputation aussi ti complètement ruiné.

Li intéressant pour connais qui, dès le commencement de ça cas-la, Hazrat Ahmad^(a.s) ti gagne ène vision dans forme ène éclair qui ti sorti de l'Occident et qui ti vine vers so la case. Quand ça éclair-la ti arrive côte so la case, li fine

changé en ène étoile. Après dans ène l'autre révélation, Allah ti dire li : « Cela ne veut dire qu'une menace des autorités qui se terminera par ton acquittement. »

Racoté, qui ène fois pendant le procès, le Colonel Douglas ti paraître bien agité, et ti pé allé vini lors plate-forme de la gare de Batala. Raja Ghulam Haider, qui ti interprète de la Cour, ti demande la raison de ça bouleversement-la, et le Colonel Douglas ti réponde : « ça cas-la pé bien bouleverse moi, parce qui côte mo viré mo trouve Hazrat Ahmad^(a.s) et li faire moi rappelle qui : 'Pas abandonne la justice britannique qui caractérise ou nation.' Et moi, mo senti qui dans ça cas-la éna la jalousie, mais mo pas connais comment mo besoin faire pour arrive à la vérité. »

22. LA PESTE AU PUNJAB

En Février 1898, dans ène vision Hazrat Ahmad^(a.s) ti trouvé qui banne Anges du Ciel ti pé plante banne ti arbustes noir et terrible dans différent parties du Punjab, et quand Hazrat Ahmad^(a.s) ti interroge banne Anges-la, Hazrat Ahmad^(a.s) fine apprendre qui ça même ça banne plantes de la peste qui pour éclaté dans Punjab-la. Et comment ti prédire la maladie ti éclaté dans plusieurs l'endroits de ça province-la et ti ravage sévèrement districts de Jullundar et Houshiarpour.

23. MUHAMMAD HUSSEIN EN DISGRACE.

Muhammad Hussein, le Caméléon de Batala, ti publié deux pamphlets côte li ti servi banne termes pour offense Hazrat Ahmad^(a.s). Le Messie Promis^(a.s) ti prié Allah pour qui Li envoie So justice ; et c'est alors qui li ti gagne ça révélation-la : « Je jetterai en disgrâce et J'humilierai le tyran de ses propres mains. » Peu de temps après, Muhammad Hussein fine mette li-même dans problèmes quand li ti écrire ène livre côte li ti dire qui banne enseignements de l'islam concernant la venue du Mahdi zotte fausses. Quand ti arrive ça, so banne propre collègues fine donne

ène verdict unanime et ti dire qui celui qui dire banne telles l'opinion anti-islamique, li ène menteur maudit comme le Dadjaal ou ène imposteur. C'est qui ti arrivé-la c'était le pire scandale et la disgrâce la plus honteuse qui capave affecté l'honneur et la réputation de ène dimoune.

24. JESUS EN INDE

De 1889-1899, Hazrat Ahmad^(a.s) ti écrire encore neuf les autres livres ; et ène là-dans ti le livre « Massih Hindustan Mein » ou « Jésus en Inde » qui racoté comment après qui ti mette li lor la croix, Jésus ti sauvé de la mort et so banne voyages en Orient (l'Inde, Kashmire, etc.) côte li ti alle cherche « banne brebis égarés de la Maison d'Israël », c'est-à-dire banne les autres tribus israélites. Dans ça livre-la ti aussi indique l'endroit côte Jésus ti enterré au Cachemire et tous ça-la ti soutenir par banne preuves et références qui trouve dans l'histoire ancienne.

25. L'INCIDENT DU MUR.

Imam Din et Nizam Din, ti deux cousins de Hazrat Ahmad^(a.s), mais zotte ti bien jaloux li, et zotte ti faire construire ène mur pour barre le passage qui ti mène vers Masjid. Plusieurs fois Hazrat Ahmad^(a.s) ti demande zotte pour casse ça mur-la afin qui banne dimoune qui envie alle Masjid pas gagne aucun difficulté pour alle faire zotte namaz régulièrement. Mais zotte ti refusé catégoriquement et à chaque fois zotte ti faire comment dire zotte pas tendé quand cause avec zotte ; et ti même besoin porte ça z'affaire-la dans la Cour Civile pour réussi arrive à ène solution. Finalement ti rendre jugement contre zotte. Zotte ti besoin démolir ça mur-la avec zotte propre la main, cé qui ti faire zotte bien bien encolère. Mais seulement, depuis avant même Hazrat Ahmad^(a.s) ti fini gagne ène révélation à propos de ça cas-la et d'ailleurs li ti fini prédire qui pour rende jugement dans so faveur.

26. LE SERMON REVELE.

En Avril 1900, Hazrat Ahmad^(a.s) ti faire so sermon Eid devant ène assemblée

d'environ 200 de so banne suivants. Ça sermon-la, li ène sermon bien célèbre par le fait qui li ti ène discours qui pas ti préparé à l'avance, mais qui Allah ti inspire li. En plus, ça discours-la ti en pur arabe. Dimounes qui ti présent à ça l'occasion-la ti surpris par la facilité, l'élégance et style qui Hazrat Ahmad^(a.s) ti faire ça discours-la. Ça sermon inspiré par Allah là connu comme le « Khutba-i-Ilhamiyya »ou Sermon Révélé.

En 1901 Hazrat Ahmad^(a.s) ti publié ène livre qui ti appelle Ijazul Massih, et ça livre-la ti considéré comme ène miracle unique en son genre parce qui so diction et so composition ti faire dans ène façon extraordinaire. Ça livre-la ti éna comme sujet le Surah Fatiha, et li ti même dire qui jamais personne pas pour capave écrire ène livre pareil coumme ça. En plus de ça Hazrat Ahmad^(a.s) ti aussi dire qui celui qui pour osé écrire contre ça livre-la pour gagne la disgrâce, et c'est Allah qui envie li comme ça, c'est So volonté ça. Muhammad Hussein qui ti reste à Bheem, ti commence écrire ène livre contre le livre de Hazrat Ahmad^(a.s), mais jamais li pas ti réussi termine livre-la parce qui ène semaine même après, li fine mort.

27. LA PROPHEETIE DE LA PESTE.

En 1902, la peste ti ravage encore ène fois avec fureur banne villages de l'Inde. Concernant ça l'épidémie-la, Hazrat Ahmad^(a.s) ti fini donne ène premier avertissement en 1898. Après li fine gagne ène nouveau révélation toujours au sujet de la peste et li fine ré-attire zotte l'attention lors ravage qui ça l'épidémie-la capave causé, et li ti invite banne dimounes pour accepté la vérité et pour tourne zotte vers Allah et pour qui zotte demande Dieu So la Grâce et So Générosité dans ça période difficile-la. Li bon qui nous connais qui, à travers banne révélations, Allah ti informe Hazrat Ahmad^(a.s) qui Li pou protège so la case contre banne calamités de la peste. Lorsque la peste ti éclaté dans l'Inde, li ti tellement sévère qui tous les jours li ti pé fané allé même, et li ti pé touche chaque famille, chaque village, et chaque la ville. Côte côte li ti pé répande, li ti pé amène que la mort. Li ti ène désastre en masse qui ti capave fini ène nation nette; mais seulement juste banne partisans de Hazrat Ahmad^(a.s) ti protégés contre ça danger-la. Pendant ça période-la

même, Hazrat Ahmad^(a.s) ti écrire ène l'autre livre qui ti appelle Ijaz-i-Ahmadi, et li ti mette au défi quiconque pour osé écrire ène l'autre livre qui rivalise avec li. Li ti aussi offert ène somme d'argent à n'importe qui capave écrire ène tel livre ; et ti fixé ène délai afin qui si éna quelqu'un qui envie écrire quique chose alors li pour besoin publié li dans ça période qui ti fixé-la.

Ti éna ène professeur érudit de 'University Oriental College', qui ti envie écrire ène livre pareil comment Ijaz-i-Ahmadi, mais, à peine qui li ti commence écrire quelques lignes qui li ti tombé et li ti mort. Ti éna aussi ène l'autre dimoune qui ti appelle Sana Ullah, li ti ène prédicateur musulman et li ti reste Amritsar, et li aussi ti faire grand grand déclaration qui li pour écrire pour rivalise avec livre de Hazrat Ahmad^(a.s), mais seulement jamais li pas ti écrire narien.

28. KARAM DIN POURSUIVE HAZRAT AHMAD^(a.s) EN JUSTICE.

En 1903, Karam Din qui ti reste à Jhelum ti poursuiwe Hazrat Ahmad^(a.s) et quelques uns de so banne partisans. Li dire qui zotte fine dire banne paroles fausses lors li ; li prétend qui zotte ti traite li de ' menteur', de 'maudit' et qui li ti faire fausse accusation. Li ti aussi dire qui ça banne causé-la fine faire li perdu so dignité, et li fine gagne disgrâce, de sorte qui banne dimounes montré ène manque du respect et de l'honneur à son égard. Et c'était ène Magistrat Arya Samajiste fanatique, qui ti pour écoute ça cas-la ; et li ti aussi promette à so communauté publiquement qui li pas pour donne Hazrat Ahmad^(a.s) repos du tout dans ça procès-la. Li ti faire ça zaffaire-la traîné intentionnellement et vers la fin, après qui ti éna ène nouveau contre-interrogatoire, li ti décide pour rendre le jugement.

Mais, seulement ça pas ti passe comment li ti envie, parce qui la veille de ça jour-la, fine transfère li, et ti remplace li par ène l'autre juge fanatique qui ti appelle Atma Ram. Sa juge-la, li ti envie à tout prix condamne Hazrat Ahmad^(a.s) et mette li dans prison, même si ça ti pour

quelque heures seulement, car so but c'était seulement pour apporte la disgrâce lors l'ennemi des Arya Samaj. Atma Ram, so madame ti faire ène reve côte ti dire li, qui so mari pour condamne Hazrat Ahmad^(a.s), qui ène dimoune droite et innocent, et après ène calamité bien dur pour tombe lors li. Li ti raconte so rêve à so mari, mais li fine riyé et pas fine prend compte. Atma Ram ti lire le jugement le samedi 8 octobre, 1904, vers les 3. 45 p.m, et li ti pensé qui quand li pour fini lire verdict-la vers les 4 heures comme-ça, et à ce moment-la, li pour refuse l'amende-la, sous pretexte qui fine déjà trop tard et qui la cour fine fermé. Dans ça façon-la banne avocats de la défense pas pour éna le choix et pour besoin vine paye l'amende le lundi quand la cour pour réprend travail et en attendant zotte pour besoin arrête Hazrat Ahmad^(a.s). Alors juge-la ti lire l'amende-la, et comment li ti dire qui l'amende-la ti Rs. 500, tout de suite l'avocat de Hazrat Ahmad^(a.s) fine jette ça somme-la lors la table, et juge-la ti bien déçu qui so plan pas fine marché.

Quand ti faire l'appelle, condamnation de Hazrat Ahmad^(a.s) fine annulé, et ler-la le juge ti critique tous les deux Atma Ram et Chandulal sévèrement. Juge-la ti aussi faire ressortir qui paroles qui Hazrat Ahmad^(a.s) ti dire pas ti fausses dans aucun façon et ti aussi réussi prouvé qui Karam Din ti ène menteur et ène 'laeem', c'est-à-dire, le maudit. En plus de ça, le juge ti sous l'impression qui banne mots qui Hazrat Ahmad^(a.s) ti servi contre Karam Din ti trop doux, car li ti mérite beaucoup plus pire qui ça.

A plusieurs reprises Allah ti dire à Hazrat Ahmad^(a.s) dans banne termes clair qui: 'Ta victoire sera comme la victoire de Hounain. 'et 'Je t'honorerai d'une belle façon.' Quant à Atma Ram, ène grand malheur ti frappe li et so famille trois semaines même après ça incident-la, li ti perdi deux garçons ène après l'autre dans ène ti période de temps, et ça ti le résultat de so injustice et de banne mauvais désirs qui li ti éna contre Hazrat Ahmad^(a.s). So madame pas ti fini pleurer pour la perte qui zotte ti souffert simplement à cause décision stupide et la méchanceté de so mari.

29. LE MARTYRE DE SAHIBZADA ABDUL LATIF SHAHID^(r.a)

Sahibzada Abdul Latif ti ène prêcheur musulman pieux et juste, qui ti reste en Afghanistan côte li ti éna des milliers de suivants. Li ti éna ène connaissance bien profond lors l'histoire islamique, la philosophie et banne la loi. Li ti ène dimoune bien respecté et honoré parmi banne qui ti près avec le roi. A l'occasion du couronnement, li ti gagne le privilège pour mette le turban lors la tête le roi. Li ti arrivé gagne banne livres qui Hazrat Ahmad^(a.s) ti écrire, et li ti bien influencé quand li ti lire ça banne livres-la. En octobre 1902, li ti quitte l'Afghanistan avec l'intention pour alle faire Hajj à la Mecque. Mais quand li ti arrive au Punjab, li fine tende beaucoup causé lors Hazrat Ahmad^(a.s) et surtout banne déclaration qui li ti pé faire, et li fine alle à Qadian. Là-bas li ti tellement impressionné et li ti tellement content la compagnie de Hazrat Ahmad^(a.s) qui ça l'année-la li ti rate le pèlerinage. Et li ti déjà convaincu qui Hazrat Ahmad^(a.s) même ti le Prophète et le Messie Promis de ça l'époque-la. Pendant so séjour à Qadian, li ti gagne aussi plusieurs révélations, et ène parmi ça banne révélations-la ti comme suit, « Donne to la vie dans So chemin, et pas besoin hésité pour faire li. Allah fine envie li comme ça pour le bien de l'Afghanistan. » Quand Sahibzada^(r.a) ti retourne à Qaboul, banne moullahs c'est-à-dire banne prêtres musulmans ti déclare li ène infidèle, et ti demande pou donne ène l'ordre contre li pour qui zotte capave lapide li. Le roi Amir Habib Ullah Khan ti faire ène grand procession et dans ça la marche-la li ti accompagné de so frère Nasrullah Khan et par le Chef Juge aussi. Quand zotte ti arrive dans place qui ti indiqué-la, ti déjà fini enterre Sahibzada^(r.a) dans la terre jusqu'à so lé-reins. Encore ène fois l'Amir ti demande li pour repentir et dire qui banne déclarations de Hazrat Ahmad^(a.s) fausses afin qui li réussi sapé et qui li ré-gagne so l'honneur. Le Amir ti supplié li et ti dire li renoncé à cause de so banne zenfants et de so famille, mais Sahibzada^(r.a) pas ti cédé, et li ti bien ferme dans so convictions. Li ti réponde qui li pas gagne aucun tracas ni pour so madame ni pour so zenfants et ni pour so propre la vie. So croyances et so conviction ti plus important pour li. Quand l'Amir ti tende ça li fine envoie ène roche, et banne spectateurs qui ti là-bas aussi fine commence envoie roches jusqu'à qui so le corps ti complètement

couvert avec roches.

Allah so justice ti tombe bien vite, comment zéclair, lors ça banne malfaiteurs qui ti commette ça crime affreux-la. Pas même vingt heures de temps après, le choléra ti éclaté partout dans Afghanistan et le peuple pas ti épargné pour ça crime-la. Des milliers de dimounes ti perdi la vie dans ça l'épidémie-la tellement li faire ravage partout. Ti éna la panique dans le pays, et banne chiens affamés et banne vautours ti pé nourri zotte de banne cadavres. Nasrullah Khan qui ti participe dans ça drame cruel-la, ti aussi perdi so madame et so garçon. Plusieurs membres de la famille du roi ti aussi trouve la mort dans ça l'épidémie-la. Quelque temps après, Nasrullah Khan fine faire complot et fine tué so frère, le roi Amir Habib Ullah. A son tour, Nasrullah Khan, ti assassiné par so neveu Amanullah Khan. Le chef juge aussi ti mort dans l'obscurité après qui le roi fine disgracié li et fouette li.

30. D'AUTRES PROPHEITIES A PROPOS DES TREMBLEMENTS DE TERRE

En 1904 Hazrat Ahmad^(a.s) ti faire deux conférences important à Lahore et à Sialkot. Banne prêtres musulmans ti faire tout zotte possible pour créé désordre à Sialkot mais seulement zotte pas ti réussi empêche banne dimounes écouter.

Au courant de ça l'année-la même, Hazrat Ahmad^(a.s) ti gagne la révélation : « Un pouvoir oriental et la condition incertaine de La Corée. », et ça prophétie-la ti accompli en 1905 par la guerre qui ti éna entre La Russie et le Japon.

Hazrat Ahmad^(a.s) ti aussi prédire ène tremblement de terre dans la vallée de Kangra au nord de l'Inde, et ça tremblement de terre-la ti éna lieu en 1905 et ti faire beaucoup dégats.

Le 20 décembre 1905 li ti prédire ène nouveau tremblement de terre dans ça terme la : « la saison printannière à commencer. La parole de Dieu a été vraiment accomplie. » Ti aussi prédire qui ça tremblement de terre-la pour accompli entre la fin de janvier et jusqu'à la fin de mai. Par

conséquent secousse-la ti éna lieu le 28 février 1906 et li ti bien affecté le Punjab, et des centaines dimounes ti perdi la vie dans ça tragédie nationale-la.

En 1906, Hazrat Ahmad^(a.s) ti prédire pire catastrophe qui pour tombe lors l'humanité, et voici ça qui li ti dire :

« Rappelle qui Dieu le Tout- Puissant fine faire moi part de banne tremblements de terre qui pour éna en général un peu partout. Qui ou prend compte ène fois pour tout et qui ou reste assuré, qui pareil comment fine éna tremblement de terre en Amérique, en Europe et en Asie d'après banne prophéties avant, pareil comme ça même pour éna encore les autres qui pour éna lieu dans différents l'endroits — quelques uns la-dans pour tellement sévère et la ruine qui li pour amené pour tellement important qui li pour ressemblé le Jour Du Jugement Dernier. La mort pour faire tellement de ravage qui la rivière du sang pour couler. En fait, la destruction lors le terre pour tellement grand qui jamais le monde pas fine trouve ène zaffaire pareil avant. Même paysage de banne pays pour changer et pour éna tellement banne scènes de la ruine qui pour bien difficile pour croire qui ti éna dimounes qui ti pé reste dans ça banne l'endroits-la.

Pour éna aussi les autres calamités bien terrible qui pour vine depuis la terre et le ciel qui pour affecter banne dimounes ; et à ce moment-la banne qui éna l'intelligence pour facilement remarquer qui la nature de ça banne quique chose-la bien extraordinaire. Et à ce moment-la banne dimounes pour dans doute et zotte pour demandé qui pour arrivé après. Pour éna beaucoup qui pour perdi la vie mais pour éna les autres qui pour réussi sauvé aussi, et ça banne jours-la bien proche, capave même dire qui zotte déjà là, et le monde pour témoigne bien vite banne scènes de désolation et de destruction incomparable. Pas pour éna seulement tremblement de terre mais pour éna aussi les autres calamités qui pour vine depuis le ciel et depuis la terre qui pour faire dégats. Tous ça là fine arrivé parce qui les hommes fine abandonne Dieu complètement et so le cœur et so âme fine tourné vers ça le monde materiel-la. Si mo pas ti

encore vini, alors ça banne calamités-la ti pour arrivé plus tard, mais seulement avec mo venue banne plans de Dieu fine rentre en fonction et So colère aussi fine manifesté — parce qui Li fine dire qui jamais Li pas envoie aucun châtiment aussi longtemps qui li pas envoie quique messenger. Toi, O Europe, to pas en sécurité ; ni Toi O Asie, et ni banne qui habite dans banne îles aussi, et aucun de zotte bondieux qui zotte fine choisir pas pour capave aide zotte ça jour-la. Mo trouve banne cités pé écroulés et banne l'endroits résidentiel en ruine. »

Dans ça qui fine mentionné-la, Hazrat Ahmad^(a.s) pas ti seulement prédire banne tremblement de terre, mais ti aussi prédire banne la guerres ; et concernant l'approche rapide de la destruction mondiale, Hazrat Ahmad^(a.s) écrire plus loin : « Même le Tsar pour dans ène l'état déplorable. » Et tout dimounes connaît qui ti la fin de la famille du Tsar de la Russie : zotte ti trouve zotte la mort après qui zotte ti besoin soumette et remette zotte dans la mains de banne assassins rebelles. A propos des tremblements de terre ti aussi révélé qui : « Mo pour montré ou manifestation de ça signe cinq fois. » Et c'est seulement l'histoire qui pour montré nous si ça révélation-la concerne banne la guerres ou bien concerne banne tremblements de terre même.

31. LA PROPHETIE AU SUJET DE NADIR SHAH.

Le 3 mai 1905, Hazrat Ahmad^(a.s) ti gagne ça révélation-la : « Ah! Où est Nadir Shah ? », et ça ti littéralement accompli quand Amanullah Khan d'Afghanistan ti détrôné dans ène rébellion qui ti faire par garçon de ène porteur de l'eau, mais après ça, c'est Nadir Khan qui ti réussi vaincre ça rebelle-la, et ti prend le pouvoir du gouvernement dans so la main en 1929. Ler-la li ti déclaré qui maintenant besoin appelle li Nadir Shah.

En 1906, Hazrat Ahmad^(a.s) ti gagne ène révélation côte ti dire : « Trois boucs seront tués. » Ça révélation-la ti réfère à trois les autres martyres de l'Afghanistan qui li lapidés à mort sous l'instruction de Amanullah Khan parce qui zotte ti Ahmadi. Et ça trois dimounes-la ti Maulvi Naimat

Ullah Khan, Maulvi Abdul Halim et Quari Nurali. Après le tyran Amanullah Khan fine conne ène la fin bien misérable.

Et pendant même l'année, Sanaullah de Amritsar, ti demande ène mobahila c'est-à-dire ène duel de prière pour invoque la colère de Dieu lors celui qui pas dans le droit chemin. A ça l'occasion-la Hazrat Ahmad^(a.s) ti écrire qui si Sanaullah éna raison dans so croyance qui Hazrat Ahmad^(a.s) pas le Messie Promis mais ène menteur et imposteur, alors Allah pour donne ène longue la vie à celui qui éna raison et pour donne la mort au menteur et l'imposteur. Quand Sanaullah ti gagne ça invocation-la, li pas fine ajoute narien. Au lieu qui li faire ène la prière semblable li fine écrire qui Hazrat Ahmad^(a.s) pas ti gagne so consentement avant li faire ène telle la prière, donc li pas capave engager la-dans. Li ti aussi demande à Hazrat Ahmad^(a.s) pour pas souhaite so la fin mais pou montré li encore ène l'autre signe. Li ti ajouté qui d'habitude c'est banne menteurs et banne imposteurs qui vivre plus longtemps qui banne bons dimounes. Ça montré qui Sanaullah ti peur la colère d'Allah et c'est seulement dans ça façon-la qui li fine capave échappé avec destruction.

32. LA FIN DU DR. DOWIE.

Dans l'Amérique, le Dr. Dowie ti dire qui li ène Messenger de Dieu. So mission et so popularité ti grandi vite.. Mais seulement li ti ène très grand ennemi de l'Islam, et dans tous so banne causeries et so banne sermons li ti pé faire appel à banne dimounes pour exterminer l'Islam à tout prix de ça la terre-la. Et quand Hazrat Ahmad^(a.s) fine tendre ça, li fine lance Dr. Dowie ène défi de mobahila, et li ti invite li pour faire ène la prière pour conner lequel so bon Dieu Li le vrai Dieu Vivant de la vérité et de la miséricorde. Dowie pas ti rende aucun réponse à ça lettre de Hazrat Ahmad^(a.s)-la, mais ti pé continué so campagne de la haine intense contre l'Islam. En 1903, Hazrat Ahmad^(a.s) ti renouvelé so défi, et li ti suggéré qui, zotte tous les deux pour prier zotte Dieu et objectif de zotte la prière c'est qui l'imposteur et le menteur pour gagne la mort le premier. Encore ène fois Dowie ti refuse pour porte attention lors l'appel de Hazrat Ahmad^(a.s) pour ça la prière-la. Li ti même faire la

remarque qui banne qui pé mette li au défi-la, zotte même zotte comment banne moustiques et banne mouches impuissant qui capave écrasé avec lipied facilement. Quand Hazrat Ahmad^(a.s) ti tende ça, li fine alors prié Allah pour envoye So Justice, et li ti gagne ène révélation qui ène « nouveau signe » pour arrivé bientôt. Hazrat Ahmad^(a.s) ti publié ça tout de suite, et après deux semaines Dowie ti paralysé, so banne propre partisans ti dénigré li et ti même accuse li de détournement, d’adultère et banne liaisons illégaux avec banne jeunes femmes. Li ti mort en 1907 dans ène l’état bien misérable sans qui ti éna quiqu’ene pour pleure so la mort.

33. LES DERNIERS JOURS DE HAZRAT AHMAD^(a.s)

Hazrat Ahmad^(a.s) ti éna 74 ans et li ti connaît qui so la fin pé approché, car plusieurs fois Allah ti faire li connaît qui so dernier jour pas loin. Le 20 mai, 1908, li ti gagne la dernière révélation qui ti concerne so la mort. Dieu ti dire li « L’heure pour le voyage vers l’éternité s’approche ; elle s’approche bien vite. Ta mort vient à grands pas. » Le 25 mai, 1908, li ti écrire so dernier livre qui appelle Paigham-i-Sulah, (Le message de paix) et li ti termine livre-la le soir. Le lendemain matin li pas ti senti li bien et li ti faire appelle so banne camarades et so banne famille auprès li. Li ti faire so namaz avant qui soleil lève ; so maladie-la ti aggravé bien bien vite et ti pé trouvé qui so la fin pé plus approché encore. Dans ça banne dernier moments-la li ti pé seulement répète ça banne mots-la : « Allah, Mon Cher, Cher Allah. » Li ti mort le 26 mai, 1908, à 10 heures a.m. Tous banne dimounes qui ti présent à ça l’occasion-la ti perdu la parole, et quand nouvelle de so la mort ti répande à travers la ville, tous so bannes disciples ti bien bouleversé. Banne dimounes pas ti rode croire qui ça nouvelle-la vrai, et ti pé demande zotte même, est-ce qui Hazrat Ahmad^(a.s) aussi mortel pareil comment les autres ? Mais li aussi li fine mort pareil comment banne les autres Prophètes qui ti vini avant pour apporte messages de Dieu à l’humanité.

34. UNE APPRECIATION DE HAZRAT AHMAD^(a.s)

Hazrat Ahmad^(a.s) ti passe toute so la vie au service de l’Islam. Li ti faire de so mieux pour prouve banne doctrines de l’Islam et établir so supériorité lors tous les autres religions. Li ti bouleverse croyances de banne chrétiens, li ti aussi montré banne enseignements inacceptables de banne Védas. Li ti ré-établir la lumière du Quor’an avec banne nouvelle interprétations et fine apporte aussi ène compréhension parfaite lors l’existence du Dieu Vivant et Unique.

Hazrat Ahmad^(a.s) ti écrire plus qui 84 livres de différents formats et presque tous ti traite banne sujets religieux. Pas capave ignore ça grand travail-la, parce qui ça banne livres-la zotte toujours-la, et zotte pour toujours ène mine de connaissance pour banne chercheurs de vérité.

Hazrat Ahmad^(a.s) ti éna ène l’amour profond pour le Saint Quor’an, et li pas ti seulement porte ène l’attention particulier lors la lecture du Quor’an, mais li ti étudié li tous les jours. Li ti éna ène niveau de pensée extraordinaire et li ti pé toujours étonne banne dimounes pendant so banne conversations. So interprétation de banne versets du Quor’an ti comment dire ène la braise qui ti ré-allume la foi. Et c’est dans ça façon-la qui li fine faire l’Islam revivre.

Li fine gagne des milliers de rêves, de visions et de révélations, qui ti comment dire ène la rivière spirituel continuel qui ti sorti depuis lors le ciel. Li ti éna l’habitude pour écrire tous so banne rêves, so banne visions et so banne révélations et li ti pé raconte zotte à so banne partisans qui ti ensemble avec li, le même jour. So banne prophéties qui fine réalisé mots pour mots pour reste tous le temps inoubliables ; et li ti aussi montré des centaines de signes à banne dimounes.

Li ti éna l’habitude pour prier pour tous dimounes, et aussi pour banne malades et pour banne qui dans le besoin. Li ti pé tous le temps conseille so banne disciples pour prier avec sincérité. Des centaines de so banne compagnons fine gagne l’occasion pour vine banne témoins vivants de so communion pur avec le Dieu le Vivant. Si Hazrat Ahmad^(a.s) ti réussi arrive à ène tel proximité avec Dieu, c’est seulement à cause de so

soumission totale à So Volonté, et li ti aussi montré qui sans ça soumission complet-la, ou pas pour capave senti la Présence Eternelle de Dieu.

LA VIE DU MOUSLEH MA‘OUD^(r.a)

1. Prophétie concernant le Fils Promis.

En 1885, ène groupe d’hindous de Qadian fine écrire le Messie Promis^(a.s) ène lettre pou demande li ène signe de la véracité de l’Islam. Le Messie Promis^(a.s) fine réponde zotte qui ène tel signe pou manifester dans l’espace ène l’année, c.à.d, en 1886. Le Messie Promis fine ensuite retire li à Hoshiarpour pendant 40 jours et pendant ça banne jours-là, li fine supplier et implorer Allah pou qui Li accorde li ène signe. C’est à ce moment-là qui Allah fine révèle au Messie Promis^(a.s) qui li pou gagne ène garçon.

En février 1886, le Messie Promis^(a.s) fine publié ène tract pou annonce révélation qui li fine gagné. Ça prophétie-là fine réalisé dans la personne de Hazrat Mirza Bashir-ud-din Mahmood Ahmad^(r.a). Dans ça prophétie-là, Allah fine promettre ène garçon au Messie Promis^(a.s) qui pou manifester la gloire du St-Coran et quand li pou vini, la vérité pou vini et le mensonge pou disparaître. La grâce pou accompagne ça garçon-là et li pou amène l’Islam vers la victoire et le succès. Allah pou montré So pouvoir à travers la venue de ça garçon-là. Li pou avancer par à grands pas; so nom pou répanne jusqu’au bout du monde et à travers li, banne nations pou gagne zotte liberté.

2. Naissance du Fils Promis

Le samedi 12 janvier 1889, le Messie Promis^(a.s) fine gagne ène garçon, et li fine appelle li Mahmoud. Le Messie Promis^(a.s) fine annoncé qui c’est li-même le Fils Promis qui ti mentionné dans prophétie. Mahmoud ti le fils du Messie Promis^(a.s) et de so deuxième épouse, Hazrat Syeda Nusrat Jahan Begum.

C’est dans ça l’année-là même, c.à.d en 1889 qui le Messie Promis^(a.s) ti donne le premier ba’iat. Donc, la naissance du mouvement Ahmadiyya

dans l'islam ti coïncide avec la naissance du Fils Promis.

3. L'éducation académique du Mousleh Ma'oud^(r.a).

Le Mousleh Ma'oud^(r.a) ti admette dans l'école de la localité mais comment li pas ti en bonne santé, li pas ti pé capave concentrer lor so l'étude et li fine fini par fail so l'examen de Matriculation (Form VI). Après ça, li pas fine alle aucun les autres l'école et ou université. Mais comme le Messie Promis^(a.s) ti prédire, Hazrat Mirza Bashir-ud-din Mahmood Ahmad^(r.a) ti éna beaucoup connaissances côté académique aussi bien qui côté spirituelle. Ça li prouvée par so banne discours qui li fine faire, par banne livres qui li fine écrire et, surtout, par so banne qualités qui li ti éna.

4. L'adolescence de Hazrat Mirza Bashir-ud-din Mahmood Ahmad^(r.a).

Hazrat Mirza Bashir-ud-din Mahmood Ahmad^(r.a) ti éna ène passion pou servi l'islam et quand li ti encore adolescent, li ti pé prépare li-même pou mette en avant la cause de l'islam. Li ti organise ène association avec banne camarades pou pratique causerie en public. Li ti aussi commence ène magazine intitulée "*Tashheez-ul-Azaan*" pou gagne pratique dans écrire banne l'articles. Banne causeries qui li ti faire et banne l'articles qui li ti écrire ti expose l'islam dans ène façon originale et vivant.

Comme ça même, dès so jeune âge, li ti prend ène l'intérêt profond dans l'étude du Saint Coran. Li ti pé reste absorbé dans le Quran et li ti pé essaye interprète li. Hazrat Khalifatul Masih I(r.a), qui ti ène amoureux du Quran, ti pé guide li dans ça l'étude-là, et à part le saint Coran, li ti pé enseigne li banne livres lors banne hadiths du Saint Prophète^(s.a.w).

Le 26 mai 1908, quand Hazrat Mirza Bashir-ud-din Mahmood Ahmad^(r.a) ti éna 19 ans, le Messie Promis^(a.s) fine décédé. A ça l'occasion-là, Hazrat Mirza Bashir-ud-din Mahmood Ahmad^(r.a) fine deboute côté lé-

corps de so papa et fine attesté à Allah le Tout Puissant qui même si tous banne suivants abandonne la mission du Messie Promis^(a.s), li pou tout le temps supporte li, et li pou continuer travaille, même tout seul si nécessaire.

Pendant tous les années qui Hazrat Mirza Bashir-ud-din Mahmood Ahmad^(r.a) fine vivre, li fine toujours marche d'après so serment, à chaque instant, jusqu'à so la mort.

5. Tôt dans l'âge adulte.

En 1911, avec la permission de Hazrat Khalifatul Masih I(r.a), Hazrat Mirza Bashir-ud-din Mahmood Ahmad^(r.a) fine établi l'association de *Majlis Ansarullah*, qui fine faire banne travaux bien utile comme répanne l'éducation à travers la communauté et instruire banne jeunes. En 1912, li fine faire *Hajj* et fine visite Mecca et Medina. En 1913, li fine commence ène hebdomadaire intitulé *Al Fazl* qui, après, fine vinne ène quotidien (publié tous les jours). Dans ça période de temps-là, li fine aussi voyager à travers l'Inde et fine faire banne discours dans plusieurs places.

Dans ça le temps-là, Hazrat Mirza Bashir-ud-din Mahmood Ahmad^(r.a) ti juste ène jeune homme mais li ti capave constater qui certains membres de la Jamaat ti pé essaye tire Jamaat Ahmadiyya du bon chemin et ti pé essaye casse l'institution du Khilafat. Hazrat Mirza Bashir-ud-din Mahmood Ahmad^(r.a) fine avertir la Jamaat de ça fait-là et fine faire face à ça banne dimounes-là avec beaucoup de courage et de détermination, et fine détruire zotte mauvais plan.

6. Election comme Khalifa.

Le premier successeur du Messie Promis^(a.s), Hazrat Maulvi Nouruddin^(r.a) ti décédé le 13 mars 1914. Ça ti ène moment bien critique pou la Jamaat. D'ène côté, la Jamaat ti plongé dans la tristesse de ça grande perte-là et de l'autre côté, banne dimounes ti pé gagne peur qui Jamaat Ahmadiyya pou fini. Entier Jamaat ti pé prier à chaude larmes afin qui Allah

le Tout Puissant sauve li depuis destruction car ti éna ène minorité de banne dimounes qui ti pé répanne le désaccord (le désordre).

A ça moment critique-là, Hazrat Mirza Bashir-ud-din Mahmood Ahmad^(r.a) fine adresse la jamaat et fine motive banne dimounes pou continuer mission du Messie Promis^(a.s).

Le jour suivant, Hazrat Mirza Bashir-ud-din Mahmood Ahmad^(r.a) fine contacté chef du groupe qui ti pé répanne désaccord-là et fine dire li qui si zotte élire ène Khalifa de parmi zotte-même, Hazrat Mirza Bashir-ud-din Mahmood Ahmad^(r.a) pou soumettre li à ça Khalifa-là. Tout ce qui li ti pé essaye faire, c'était garde ça banne dimounes-là attaché avec Khilafat. Mais quand même ça, banne dimounes-là fine refuse proposition de Hazrat Mirza Bashir-ud-din Mahmood Ahmad^(r.a), parce qui zotte ti éna l'intention pou détruire l'institution du Khilafat.

Ça même jour-là, environ 2000 dimounes ti rassemblé, après namaz *Zohr* dans la cour de Masjid Nour pou élire le nouveau Khalifa. D'abord, Hazrat Nawab Muhammad Ali Khan fine lire le testament du Khalifatul Masih I(r.a), dans lequel li fine dire qui li désire qui la Jamaat élire ène Khalifa après so la mort. Quand l'assemblée fine fini tende ça testament-là, zotte tous fine crié: "Hazrat Mian Saheb", c.à.d, zotte tous ti pé vote pou Hazrat Mirza Bashir-ud-din Mahmood Ahmad^(r.a).

Ensuite, ène ancien compagnon du Messie Promis^(a.s) fine vinne devant l'assemblée-là et après qui li fine mette l'emphase lors l'importance du Khilafat, li fine propose le nom de Hazrat Mirza Bashir-ud-din Mahmood Ahmad^(r.a) officiellement et entier l'assemblée fine crié: "Nous seconde li, nous seconde li!". Après ça, banne dimounes-là fine insisté pou prend ba'iat de la main de Hazrat Mirza Bashir-ud-din Mahmood Ahmad^(r.a).

Maulvi Muhammad Ali, le chef de banne qui ti envie la destruction du Khilafat, fine deboute pou dire quiquechose mais l'assemblée-là fine arrête li. Ensuite presque tous dimounes qui ti présent fine levé et fine rassemblé autour de Hazrat Mirza Bashir-ud-din Mahmood Ahmad^(r.a) et fine prend

ba'iat de so la main. Hazrat Mirza Bashir-ud-din Mahmood Ahmad^(r.a) ti pé hésiter mais quand banne dimounes fine insister, li fine accepter pou donne le ba'iat. Quand fine fini prend ba'iat, entier l'assemblée fine faire doah pou ène très longue moment afin qui Allah béni Jamaat et so nouveau chef.

Après ça, Hazrat Mirza Bashir-ud-din Mahmood Ahmad^(r.a), maintenant Hazrat Khalifatul Masih II(r.a), fine deboute et fine dire qui malgré qui li ène mortel et qui li bien faible, li éna la certitude qui Allah pou donne li le pouvoir pou li accomplir so banne responsabilités et li fine demande Jamaat pou supporte le Khilafat.

Maulvi Muhammad Ali et so banne partisans fine découragés et fine quitte l'assemblée. Après quelque temps, zotte fine quitte Qadian et fine établi ène *Anjuman* séparé à Lahore. Avec le temps, zotte fine réalisé qui zotte en minorité.

7. Entreprise missionnaire.

Premier objectif de Hazrat Khalifatul Masih II(r.a) c'était de répandre Jamaat bien vite dans les autres pays du monde. Li ti commence prépare banne missionnaires pou qui zotte établir banne missions à l'extérieur de l'Inde et Pakistan, et produire banne livres qui pou capave distribuer dans ça banne pays-là.

Premier mission Ahmadiyya ti établi en Europe en avril 1914. Choudhry Fateh Mohammad Sayal qui ti le premier missionnaire ti alle Londres et li ti acheté ène boutte la terre à Southfields qui aujourd'hui contenir Mission House de Masjid Fazl (London Mosque). Depuis ça, fine éna beaucoup missionnaires qui fine alle Londres.

En 1915, la Jamaat fine établi à Maurice côte beaucoup banne livres du Messie Promis^(a.s) fine traduire en français. En fait, l'île Maurice ti ène centre pou Jamaat pou produire et distribuer banne livres en français lor l'Islam et l'Ahmadiyyat.

Hazrat Khalifatul Masih II(r.a) fine visite Londres en 1924 pou participe

dans ène conférence lor banne Religions. Choudhry Mohammad Zafrullah Khan^(r.a) ti lire so causerie qui ti ène résumé du livre ‘Ahmadiyyat or the True Islam?’ qui ti publié après. Pendant so séjour à Londres, Hazrat Mirza Bashir-ud-din Mahmood Ahmad^(r.a) ti pose la première pierre de Masjid Fazl le 19 octobre 1924.

En 1934, li fine créer ène nouveau plan sous le nom de *Tehrik-é-Jadid* pou finance banne nouveau missions en dehors de l’Inde. Dans banne l’années 1935 à 1938 la Jamaat fine établir banne missions dans Pologne, Hongrie, Yougoslavie, Italie et Albanie et plusieurs livres fine traduire dans langues de ça banne pays-là. Malheureusement, quand la deuxième guerre mondiale fine commencé, ça banne missions-là fine fermés et pas fine capave recommence zotte. Mais aujourd’hui éna beaucoup convertis Ahmadi dans ça banne pays-là. Comme ça même, ène mission ti établi en France mais après quelques temps, fine besoin abandonne li.

En 1955, pou banne raisons de santé, Hazrat Khalifatul Masih II(r.a) fine ré-visite l’Europe pou la deuxième fois et fine établir plusieurs les autres missions là-bas.

Mais après ça, la Jamaat fine établir banne missions dans beaucoup les autres pays côte fine aussi construire banne masjids et fine traduire beaucoup banne livres, y compris le Saint Coran dans langues de ça banne pays-là.

8 L’éducation morale de la Jamaat.

Hazrat Khalifatul Masih II(r.a) ti bien concerné par l’éducation morale de la communauté. Pendant plusieurs l’années, li ti pé enseigne le Quran à banne missiés et banne madames séparément. Plus tard, li fine publié *Tafsir-é-Kabir* et *Tafsir-é-Saghir*, qui banne commentaires du Saint Coran en Urdu. Ça banne commentaires-là fine aussi traduire en plusieurs langues.

Bannes *Khutbah Jummah* et banne causeries du Mousleh Ma’oud^(r.a) dans banne Jalsas fine contribué énormément à l’éducation morale de la

Jamaat. Zotte ti contenir banne guides pou le Jamaat dans la vie de tous les jours.

Hazrat Mirza Bashir-ud-din Mahmood Ahmad^(r.a) fine aussi créé le *Majlis Ansarullah*, le *Majlis Khuddam-ul-Ahmadiyya*, *Atfaalul Ahmadiyya*, *Lajnah Imai’llah* et *Nassiratul Ahmadiyya*. Li fine fixé banne objectifs et banne constitutions pou ça banne organisations-là pou qui zotte réforme zotte banne membres et en même temps, contribuer pou le progrès de la Jamaat en général.

9. Le Minaratul Massih.

En 1903, le Messie Promis ti pose la première pierre du Minaratul Masih. Fine besoin arrête projet-là parce qui Jamaat pas ti éna assez fonds. Hazrat Khalifatul Massih II fine continué construction du Minaratul Masih en 1914, et so construction fine complété en 1916. Ça minaret-là ti construit pou accomplir prophétie du Saint Prophète^(s.a.w) lor la venue du Messie, qui ti pou descende lor ène minaret blanc.

10. L’assemblée consultative.

En 1922, le Mousleh Ma’oud^(r.a) fine établir l’assemblée consultative, le *Majlis-é-Mushawarat* (ou le *Majlis-e-Shura*) et li fine insisté qui ça comité-là rencontrer au moins ène fois par an. Ça comité-là so fonction c’était pou guette budget annuelle de la Jamaat et aussi banne propositions qui banne dimounes fine faire pou le progrès de la Jamaat, et soumettre banne recommandations au Khalifa.

Dans ça l’assemblée-là ti éna banne délégués et quelques banne nominés du Khalifa, et ça banne rencontres-là ti pé commencé et ti pé fini par doah.

11. Martyres.

En 1924 quand Hazrat Khalifatul Masih II(r.a) ti à Londres, ène Ahmadi,

Hazrat Maulvi Nimatullah Khan ti assassiné à coups de pierre à Kabul. C'était ène l'ordre qui le roi fine donné suite à banne manifestations de banne *Mullahs*.

Avant qui tué li, zotte ti demande Hazrat Maulvi Nimatullah Khan pou renonce à l'Ahmadiyyat et sauve li-même, mais li fine refuser. Quand Hazrat Khalifatul Masih II(r.a) fine appranne ça incident-là, li fine choquer terriblement. La presse international fine condamne ça atrocité-là. Maulana Mohammad Ali, qui ti chef de banne musulmans (non-Ahmadis) de l'Inde, fine écrire ène série de banne l'articles pou prouvé qui banne raisonnements religieux de ça banne *Mullahs*-là ti fausse et qui zotte ti fine mette banne dimoune dans l'erreur.

12. Guide politique.

Comme ène chef religieux, Hazrat Khalifatul Masih II(r.a) pas ti content pou prend part dans banne z'affaires politique du pays mais comment ça ti pé affecter le futur de banne musulmans, le Khalifa ti besoin quelques fois intervenir dans la politique. Dans banne l'occasions critique, li ti pé besoin intervenir pou montrer banne musulmans le droit chemin.

En 1921, quelques musulmans non-Ahmadis fine déclaré qui le Gouvernement Britannique ti gouvernement de banne *Kafirs* et banne musulmans de l'Inde ti besoin émigrer en Afghanistan. Hazrat Khalifatul Masih II(r.a) fine tout de suite condamne ça et fine dire à banne musulmans qui si zotte faire ça, zotte pou bien souffert et zotte pou retourner avec disgrâce. Le Mouvement Ahmadiyya pas fine capave convaincre bon nombre de musulmans et banne qui fine alle en Afghanistan fine besoin retourner et zotte fine perdi tous zotte du-biens.

Bannes Hindous ti pé publier banne livres qui ti contenir banne insultes contre le Saint Prophète^(s.a.w) et ça ti pé provoquer ennemité entre hindous et musulmans en Inde. Hazrat Mirza Bashiruddin Mahmud Ahmad fine travaille dur pou qui mette debout ène la loi contre ça méchanceté-là.

De plus, banne hindous ti pé domine banne musulmans et comment tous banne musulmans pas ti unis, zotte pas ti pé capave oppose banne hindous fanatiques-là. Hazrat Khalifatul Masih II(r.a) fine suggéré qui tous musulmans réuni coumma ène seul groupe afin qui zotte capave faire face à banne qui oppose zotte.

En 1928, Hazrat Khalifatul Masih II(r.a) fine introduire banne rencontres public tous les années au niveau nationale pour invite banne représentants de différent religions pou faire banne causeries lors le Saint Prophète^(s.a.w).

Ça banne rencontres-là ti pé appelle *Sirat-un-Nabi*. So raison c'était pou éduquer banne dimounes lor la vie du Saint Prophète^(s.a.w) et efface banne malentendus qui ti éna. Ça banne rencontres-là ti bien utiles et zotte fine contribuer pou amène ène bon relation entre banne différent communautés.

Hazrat Mirza Bashiruddin Mahmud Ahmad^(r.a) fine joué ène grand rôle pour accorde banne musulmans de Kashmir zotte droits. Malgré qui zotte ti en majorité dans zotte pays, zotte pas ti gagne zotte banne droits et zotte ti pé souffert persécution. Hazrat Khalifatul Masih II(r.a) fine travaille dur pou éduquer zotte lor politique et faire zotte sorti de ça situation critique-là.

13. Exode de Qadian.

Quand Pakistan fine créé, ti éna banne émeutes (la foule dimounes qui faire désordres) partout dans le pays et banne musulmans ti forcés pou quitter l'Inde et banne non-musulmans ti forcés pou quitter Pakistan. Banne voyous ti pé profite de ça banne l'occasions-là pou attaque banne dimounes et coquin zotte banne z'affaires. Malgré supplications de banne Ahmadis, Qadian fine trouve li dans l'Inde. A cause de banne bandits qui ti présents dans banne chemins qui sorti de Qadian pou alle Pakistan, voyage de banne Ahmadis vers Pakistan ti ène gros problème. Banne musulmans Ahmadis ti besoin voyage environ 70 miles pou alle Pakistan.

Hazrat Khalifatul Masih II(r.a) ti fini réalise l'importance de ça problème-là et avant qui banne émeutes vinne graves, li ti fini alle Lahore. Là-bas, li fine

rencontre Jawaharlal Nehru qui ti alle Lahore pou ène conférence, mais li pas fine capave faire aucun démarche pou assure sécurité de banne Ahmadis qui pou quitte Qadian. Finalement, après beaucoup travail, Hazrat Khalifatul Masih II(r.a) fine capave trouve ène arrangement de véhicules et militaires (soldats) pou transporte banne familles Ahmadis de Qadian en toute sécurité.

Comme Qadian ti ène l'endroit sacré, 313 Ahmadis fine rester pou monte la garde. Ça nombre-la fine grandi quand banne familles Ahmadis de banne les autres parties de l'Inde fine vine installe zotte là-bas. En 1975 ti éna à peu près 1000 Ahmadis qui ti habite Qadian. Parmi zotte ti éna Sahibzada Mirza Wassim Ahmad, qui est le fils de Hazrat Mirza Bashiruddin Mahmoud Ahmad^(r.a).

14. Rabwah

Établir Jamaat à Rabwah ti ène très grand pas en avant pou l'Ahmadiyyat. Jamaat ti arrive Pakistan la main vide; tout ce qui Jamaat ti éna avant partition de l'Inde, fine perdu. Le 20 septembre 1948, Hazrat Khalifatul Masih II(r.a) fine pose premier pierre du nouveau centre et pendant les 20 ans qui fine suivre ène la ville fine né depuis ène place côte pas ti éna même ène brin l'herbe.

15. Hazrat Ummul Momineen.

Pendant la nuit du 20 au 21 avril 1952, Hazrat Ummul Momineen Nusrat Jahan Begum^(r.a) fine décédé. Li ti âgée de 86 ans. Hazrat Mirza Bashiruddin Mahmoud Ahmad^(r.a), qui ti so fils aîné, fine faire so *Namaz Janaaza* le 22 avril et li fine enterrée à *Bahishti Maqbara*. Hazrat Nusrat Jahan Begum^(r.a) ti ène madame bien pieuse, gentille et généreuse; li ti éna ène l'amour profond pou l'Islam et l'Ahmadiyyat et li ti éna confiance en Allah et dans la vérité. Li fine élevé so banne zenfants avec meilleurs de banne valeurs Islamiques et tous so banne zenfants, surtout Hazrat Mirza Bashiruddin Mahmoud Ahmad^(r.a), fine bien servi l'Islam.

16. L'Opposition

Pendant le Khilafat de Hazrat Mirza Bashiruddin Mahmoud Ahmad^(r.a), Jamaat fine faire face à banne persécutions à plusieurs reprises et chaque fois li ti pé paraîte qui astère Jamaat pou fini. Mais Hazrat Khalifatul Masih II(r.a) fine faire face à ça banne situations-là avec beaucoup courage et confiance en Allah, et li fine proclamer qui Jamaat Ahmadiyya jamais pas pou perdant dans ça banne persécutions-là mais, au contraire li pou alle de l'avant. En fait, comment li fine prédire, à chaque fois Jamaat ti plus fort qui avant.

Mais comme fine mentionné plus tôt, ti éna certains dimounes qui ti envie détruire l'institution du Khilafat.

En 1927, ène groupe fine mette banne accusations lor Hazrat Mirza Bashiruddin Mahmoud Ahmad^(r.a), mais zotte pas fine capave faire li du mal ni zotte fine capave faire du mal à la Jamaat.

En 1937, ène dimoune appelle Sheik Abdul Rahman Misri fine faire la même chose mais encore ène fois, Jamaat pas fine détruire et fine vine encore plus fort. Ene l'autre groupe fine rebelle contre le Khilafat en 1956. Mais banne membres de la Jamaat fine reste unis et confiants dans le Khilafat.

En 1934 ène parti, qui ti appelle *Ahraar*, fine monte le pays entier contre Jamaat Ahmadiyya; zotte fine répanne la haine et banne malentendus contre l'Ahmadiyyat et ti même éna banne officiers du Gouvernement de Punjab qui ti pé supporte ça parti-là. Ça fine faire zotte croire qui zotte pou capave détruire Jamaat, mais dans ène *khutbah* Jummah, Hazrat Khalifatul Masih II(r.a) fine déclaré:

“La terre pé glisser depuis enbas li pied de l'ennemi et zotte la fin pé approcher.” (Al-Fazal, mai 30, 1935).

Tout de suite après ça proclamation-là, banne évènements fine changé comme par miracle. Depuis bien longtemps, banne Sikhs et banne

musulmans ti pé disputer à cause de ène Masjid qui ti appelle *Shahidgunj*. Ça discussion-là fine ré-lévé et banne musulmans fine faire demande pou gagne Masjid-là. *Ahraar* fine mette li de côté de banne Sikhs. Résultat de ça action-là ti extraordinaire : la masse musulmane, qui ti contre Jamaat, fine maintenant tourne contre *Ahraar* qui pas fine capave lève so la tête encore.

En 1953, hostilité envers banne Ahmadis fine ré-faire surface. Jamaat fine besoin faire face à ène situation plus critique qui en 1934. Partout dans le pays ti éna banne réunions côte ti pé créer la haine contre l’Ahmadiyyat dans le coeur de banne dimounes. Le résultat c’était qui ti commence éna banne émeutes et ti éna beaucoup vols dans banne Ahmadis zotte la-cases; ti éna même banne la case qui ti prend du feu et quelques Ahmadis fine perdus la vie dans ça banne émeutes-là. Le Gouvernement de Punjab fine prend part de banne mécréants. Mais Hazrat Khalifatul Masih II(r.a) pas fine perdu courage et dans ène *khutbah* li fine dire:

“L’Ahmadiyyat fine planté par Allah Li-Même... Si ça banne dimounes-là gagné, li veut dire qui nous banne menteurs. Mais si nous dans la vérité, ça banne dimounes-là pou banne perdants.” (Al-Fazal, février 15,1953)

Banne qui ti pé créer désordre fine humiliés; Allah fine aide Jamaat dans ène façon extraordinaire et banne qui tipé envie détruire Jamaat, fine détruit zotte-même.

17. Le Tarik-é-Jadid

Après banne méchanceté qui ti répanne par *Ahraar Party* en 1934, Hazrat Khalifatul Masih II(r.a) décidé qui besoin renforcé discipline qui ti éna dans Jamaat, pou qui li pas subir banne persécutions dans le futur. Donc, le Khalifa fine lance ène nouveau programme qui appelle *Tarik-é-Jadid*, côte banne musulmans qui pé contribuer dans ène fonds qui ti pé servi pou finance

certaines activités de la Jamaat, surtout à l’extérieur. Le Khalifa ti pé aussi encourage banne dimounes pou amène ène la vie bien simple, et autant que possible faire banne travail Jamaat.

L’établissement du *Tarik-é-Jadid* fine éna beaucoup de succès et fine établir dans plusieurs pays. Banne dimounes ti pé embrasse l’Ahmadiyyat en grand nombre et le Quran ti pé publié dans plusieurs banne langages. Jamaat ti pé faire de plus en plus de sacrifices et beaucoup de banne jeunes hommes tipé dédier zotte la vie pou service de la communauté. Depuis ça le *Tarik-é-Jadid* fine vine ène institution permanent de la Jamaat et li pé continuer grandi.

18. Revendication d’être le Reformateur Promis

Le Mousleh Ma’oud(r.a) jamais pas ti déclaré qui li le Reformateur Promis qui ti prophétisé dans le pamphlet vert du 20 février 1886 tant qui Allah pas ti fine informe li de ça dans ène rêve. Le 28 janvier 1944, li fine faire part de so rêve à tout le Jamaat dans ène Khutba Jummah. Après ça li ti faire banne conférences à Houshiarpour, Lahore, Ludhiana et Delhi pour annoncer qui li-même le Reformateur Promis.

19. Attentat lor la vie de Hazrat Khalifatul Masih II(r.a)

Le 10 mars 1954, ène dimoune fine attaque Hazrat Khalifatul Masih II(r.a) quand li ti pé faire namaz *Asr* dans Masjid Mubarak à Rabwah. Ça dimoune-là fine plante ène couteau dans le cou du Khalifa.

Hazrat Khalifatul Masih II(r.a) fine gagne banne soins médicaux toute suite, et li fine rétabli pou quelque temps. Mais en 1955, so l’état fine détérioré. Accompagné de so famille et de quelques compagnons (parmi ti éna Chaudhri Muhammad Zafrullah Khan), le Khalifa fine entreprendre ène voyage pou l’Europe, malgré qui so l’état de santé pas ti correcte, Hazrat Mirza Bashiruddin Mahmood Ahmad^(r.a) fine continuer travail; li fine faire ène conférence, côte ti éna tous banne missionnaires Ahmadis depuis entier le

monde, à Londres. Le 25 septembre 1955, li fine retourne à Rabwah.

20. Publications

Ène de banne plus grand travail de Hazrat Khalifatul Masih II(r.a) c'est longue commentaire du *Saint Quran, Tafsir-é-Kabir*, et aussi ène commentaire plus courte, *Tafsir-é-Saghir*. Parmi banne les autres livres du Musleh Maoud^(r.a) éna:

Dawatul Amir (traduit en anglais-*Invitation to Ahmadiyyat*)

Tuhfatul Maluk.

Haqiqat al-Nabuwwat.

Ahmadiyyat or the True Islam.

Sair-i-Ruhani vols. 1-3.

Inqilab-i-Haqiqi.

Hindustan ke siyasi Masala ka hal.

Paigham-i-Ahmadiyyat.

Fazail al-Quran.

De plus, en 1913, avant qui li vinne Khalifa, le Musleh Maoud^(r.a) ti lance *Al-Fazal*. Premier édition de ça journal-là ti publié le 13 juin et li ti pé sorti chaque semaine. Mais en mars 1935, li fine commence sorti tous les jours. À travers *Al-Fazal*, beaucoup de banne moments historiques de l'Ahmadiyyat, surtout pendant le Khilafat de Hazrat Mirza Bashir-ud-din Mahmud Ahmad^(r.a), fine préservés.

21. Waqf-é-Jadid

Le 27 septembre 1957, le Musleh Maoud^(r.a) fine établir le *Waqf-é-Jadid*, qui ti responsable pou l'éducation morale et religieuse de banne villageois de

Pakistan. Li fine demande banne jeunes Ahmadis pou dédier zotte la vie pou ça cause-là. Beaucoup de banne jeunes fine vine de l'avant et après qui zotte fine gagne banne instructions, zotte fine placés dans plusieurs villages.

22. Le Calendrier Hijrah Solaire

Calendrier qui banne musulmans ti pé servi dans Pakistan ti basé lor soleil et ti commencer avec naissance de Jésus Christ^(a.s), tandis qui *Hijrah* ti basé lor la lune. Donc, Le Musleh Maoud^(r.a) fine introduire ène calendrier *Hijrah* qui ti basé lor banne calculations solaires.

23. Conseils du Mousleh Ma'oud(r.a)

À plusieurs reprises, le Khalifa fine écrire banne instructions pou Jamaat. En 1947, li fine écrire:

“Qui Allah protégé zotte et aide zotte et qui Li sauve zotte et pas laisse zotte tomber. Garde le nom de l'Ahmadiyyat bien haute. Pas laisse la voix de l'Islam étouffer. Pas laisse le nom d'Allah effacer. Appranne le Saint Coran et Hadiths du Saint Prophète^(s.a.w), et montrer ça à banne les autres. Pratique li zotte même et faire les autres pratique li. Besoin éna parmi zotte banne qui près pou dédier zotte la vie pou la cause de l'Islam. Khilafat besoin continuer pou tous les temps et banne croyants besoin près à tout jamais pou sacrifier zotte-même pou li. Faire la vérité vine zotte bijoux; la loyauté, zotte beauté; frayeur et l'amour pou Allah, zotte inspiration.” (Al-Fazal, novembre 11, 1965).

24. Le décès de Hazrat Khalifatul Masih II(r.a)

En mai 1959, Hazrat Khalifatul Masih II(r.a) fine tombe bien malade, peut-être à cause de la quantité travail qui li ti pé faire. Banne spécialiste ti vini depuis quelques pays pou soigne li, mais so condition ti pé détérioré.

Dans la nuit du 7 à 8 novembre 1965, li fine respire so dernier souffle. Li ti

âgé de 77 ans.

Jamaat entier fine éprouve ène chagrin profond et tous banne membres ti senti qui zotte fine perdi ène grand leader, ène guide, et ène camarade. Mais Jamaat fine accepter la volonté d'Allah.

Le soir du 8 novembre, l'élection de Hazrat Khalifatul Masih III(r.a) fine éna lieu et le jour suivant, le nouveau Khalifa fine conduire *Namaz Janaaza* du Musleh Maoud^(r.a). Ti éna à peu près 50,000 Ahmadis Pakistanais qui ti vinne à Rabwah. Après *Namaz Janaaza*, le deuxième successeur du Messie Promis^(a.s), fine enterré à *Bahishti Maqbara*, tout près côte tombe de so maman, Hazrat Amma Jaan (que la paix d'Allah lor zotte pour toujours).